

薛敬軒先生文集

三



薛敬軒先生文集

(三)

薛 瑄 撰

王雲五主編
叢書集成初編
薛敬軒先生文集
三冊

中華民國二十五年六月初版

撰者 薛瑄

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

嚴

二〇二五

(本書校對者陳敬衡)

通

薛敬軒先生文集卷之六

記

存化書堂記

襲封衍聖公孔君彥縉作堂盛積古今書名曰存化書堂蓋取過化存神之語以景慕先聖之至德且以自勵云爾正統辛酉春予至闕里謁先聖退遂登其堂君告予以名堂之意如前所云者且求爲之記予惟先聖存神過化之至德豈易知哉在當時顏氏知之曾氏知之其次惟端木氏幾足以知之及子思孟軻氏歿涉秦歷漢魏晉宋齊梁隋唐之季知者寥寥焉罕見其人至周程張朱四子者作始克探先聖之至德於千載之上而繼孟氏百世既絕之知而朱子猶謂其過化存神之妙未易窺測顧予何所知而敢記斯堂乎雖然嘗誦先聖遺經以及顏曾思孟周程張朱之言而竊求先聖身心之實矣則其至德或可髣髴其一二乎蓋先聖之心虛靈洞徹萬理咸備而天下之道千變萬化皆由此出但其寂然不動之時初無聲臭可聞無涯涘可測此其所存者神與先聖之耳目口鼻四肢百骸之形雖與人同而踐形盡性則非人所及故其身示至教如天之垂象凡所經歷威儀辭氣所接即羣動無不孚格變易此其所過者化與夫先聖之至德如是而君以之名堂真知所景慕哉然先聖之至德非獨先聖有之乃天下萬世所

公有者也。況君以神明之胄，亦既知景慕矣。所謂自勵者，其可忽乎？居是堂，讀是書，存是心，修是身，加之，以篤信持久不息之功，將見周程張朱氏之知者，不在乎他姓矣。

山東按察司題名記

古者職風紀，司諫諍，各有其官。我皇明有天下，準酌古今，定立官制，乃罷諫官，而以言責付之風紀。凡任御史按察者，於百司之邪正，庶獄之冤疑，既得扶抑而伸理之。至於國家小大之政，生民休戚之情，又得條陳其得失，而疏通其壅蔽，是其關繫治道之大，類非他比。故自祖宗以來，著令選任風紀，必於端人正士，通儒術識大體者取之，而雜進之才，弗得以廁其閒。列聖重光，咸用茲道。今皇上祇若成憲，爰自臨御之初，卽簡飭內外憲臣，使各修其職，繼命儒臣考定憲綱成書，頒布風紀諸司，俾遵行之。由是紀綱以之大振，庶政爲之咸新。正統元年夏，予自內臺來僉山東憲事，又三年爲正統四年，金谿王公裕亦由御史陞秩憲副，嘗與予論風紀之重如前所云者。將刻今按察諸公之名於石，仍虛其次，以俟後來之爲是職者，并刻焉。且屬予記其事。嘗觀司馬公之記諫院題名也，謂後世將指其名而議其忠詐曲直，有可懼者。今之選任按察，既爲國家所重，所謂扶正抑邪，洗冤澤物，論天下之事，廣視聽之公，關繫治道之大，又非特諫諍之一事，而其列名茲石也。後之人亦將歷指而議之曰：某也賢而舉其職，某也否而壞其官，是其可懼。殆有甚於司馬公之所言者矣。然則凡我風紀君子，其可不自重也夫？其可不自慎也夫？

沂濱書舍記

沂舊魯城南水也。卽曾點所謂浴乎沂者。水源出乎地。流而爲溪。渟洄曲折。甘冽潔清。可溯可沿。可酌可飲。蓋魯地之佳水也。曲阜令孔君公堂。作室於其濱。盛積古今書於中。每政暇必出游。游必於是。至則水在庭戶。清泠之聲以潔其耳。激虛之色以潔其目。瑩徹之光以潔其心。取卷左右。俯而讀。仰而思。天地四時陰陽變化之理。古今萬物眞常不息之道。以至上及邃古禮樂刑政。人物世道。因革得失。賢否升降之由。靡不博之於書。約之於心。去其非。取其是。以爲修己治人之資。是則沂濱之舍。豈徒爲觀游宴佚作哉。孔君孔聖裔也。必不私其所得。安得春和景明時。尋其室於清沂之濱。讀其書。求其志。又相與樂古人之樂於千載之上。

約齋記

約有守約處約以約之不同。以約者。不自放云耳。處約者。安儉素也。守約則會萬爲一。以一應萬。聖賢傳道之器在焉。曾子孟子是也。山西右布政使楊公。嘗治齋居。以約名之。公自少時砥礪名節。以詩經登進士第。給事黃門。繼爲廷臣推薦。陞山西參政。三轉而爲今職。言乎處約。公已宦達矣。言乎以約。公歷官既久。莅事滋慎。言乎守約。公由明經發迹。固嘗挹邴鄒之遺風。於三者之義何取邪。竊思夫公之名齋。殆將兼之也。恆人之處寒素。或不能安履其常。而志繫外物者有焉。公自爲士子。確乎不易其操。於衆人之營營者。無以動其念。非能處約之久者乎。自筮仕以至大官。謹致其操施而不放。非以約者能無失乎。二者是固然矣。獨惟守約者。曾子以是求諸身。孟軻氏以是修於己。施於人。公旣挹邴鄒之遺風。寧不知探其

闢而發其微乎。明會萬爲一。以一應萬之妙。謹修其身。於以著而爲忠貞之節。形而爲句化之政。施之無往不可。俾大賢事業。偉然見於數千載之下。則廊廊之風。豈徒挹之云乎哉。若然則彼二者特守約中之一事耳。予故曰公之名齋。殆將兼之也。

唐文學館學士畫像記

四川大參楊公伯玉家藏唐杜如晦以下十八人畫像一幅。各著官爵姓字里居。與夫賜品服年歲。并題贊於其左。蓋太宗爲天策上將時。文學館十八學士也。當高祖武德七年。太宗以四方寇亂。漸迄削平。意嚮儒術。故置是館於宮側。以杜如晦。于志寧。蘇勛。薛收。蓋文達。薛元敬。房玄齡。李守素。顏相時。蘇世長。虞世南。孔穎達。姚思廉。褚亮。蔡允恭。陸德明。李元道。許敬宗。十八人。并以本官爲學士。收卒後。以劉季孫補之。且命爲畫像題贊。藏之書府。卽世所謂十八學士登瀛洲者是也。夫瀛洲異書。以爲海中之洲。非仙者莫能到。世以得學士之列者。若登仙然。當時後世孰不企慕之哉。夷考諸人。始終行事。或以相業稱。或以經術顯。或以忠直著節。或以清白砥操。與夫文學之長。字畫之能。雖其賢才有大小之分。然皆不失爲士之行。可謂無愧於登瀛之喻矣。獨恨一許敬宗。後來以奸言誤主。貽禍宗社。生靈爲唐室之巨賊大蠹。而亦得以與此清列何耶。且太宗英王也。自以十八人者。極一時之選矣。而猶不能察敬宗之奸邪。知人之難。固如是哉。後之人但知循襲舊迹。以敬宗與諸君子並爲圖像而品題之。然邪正不分。賢否同譽。何以示教。謂宜作此像者。當削去敬宗官稱題贊。直以名目之。而諸君子之像贊官爵自仍其舊。庶幾觀者有

所感激懲勸亦世教之一助也。

永思堂記

人子生於親之膝下。方其幼也。其親出入顧復。惟恐驚之。癘之。饑之。渴之。蓋未嘗須臾忘其子之身而欲其安也。及少長也。其親誨諭諄。悉示之以孝弟忠信之道。陶之以詩書禮樂之方。未嘗一念忘教其子而欲其入於善也。逮其成立。處於鄉。則欲其子以賢行自著。仕於官。則欲其子以忠廉自修。是其親之心。又曷嘗一日忘愛其子。而欲其始終有所成就哉。親之恩如是。故其歿世雖遠。人子之喘息呼吸。卽親之遺氣。人子之身體髮膚。卽親之遺體。則所以追念其親之撫摩保愛教誨期願之恩。而惻愴悲思之情。出於中心之誠。自不能忘於一息之間。與子之身相爲始終者。是乃天理民彝之至。非由外鑠也。詩人所謂永言孝思者。殆以是歟。楊君伯玉。江西瑞州高安人也。自在鄉里時。已失怙恃。每撫遺體。感遺氣。而追念其二親撫摩愛誨期願之恩。泫然憂悲。不能自己。因取詩人永思之言。以名其所居之堂。其後伯玉登進士第。爲御史。爲按察僉事。臬官至四川參議。所至官舍。必寓以永思之名。所謂惻愴悲思之情。出於中心之誠。無閒於一息。與吾身爲終始。是乃天理民彝之至者。伯玉白首不渝焉。其可謂能踐永思之孝者已。伯玉兩任風紀。荷國家推恩。皆得贈其親之官。如己之秩。榮賁泉壤。光動里閭。伯玉又足以遂永思之情矣。今參議九年秩滿。前後居顯官者三十年。所至必舉其職。而無纖毫之玷。是皆自永思之孝。擴而爲事上之忠。旣忠且孝。有子如伯玉。雖其二親亦可無憾於九泉。而是堂之名。亦將傳於永久矣。於是乎書。

蒲州重修廟學記

蒲州廟學得州治東南爽塏之地。爰自皇明混一寰區。武功旣偃。文教誕興。而廟學實肇建焉。今歲月寢久。大成殿以及兩廡。門宇廚庫。棟楹桷桶蓋瓦級。輒丹堊圻餒。悉有腐撓穿漏。漫漶缺落之處。殿之規制。亦迫於庫隘。每春秋釋奠。鼎俎豆籩几案。羅列前後。稠市周旋。執事殆不可容。薦裸興俯。不中法式。行禮者病焉。咸寧張公廉初。以鄉進士。彙官節判是州。未幾民皆安其政之良。適州缺守。吏民則相率狀其績於朝。遂就陞知州事。念廟學實國家崇建。教道人才所自出。關繫甚大。一州之政。宜莫先焉。爲郡而不此之急。其何以仰副國家崇重之意。卽謀諸寮佐。量功度費。鳩工取材。以訓科辛致老人王景敍董其役。廣大成殿。爲閒者五。東西廡。門宇廚庫。悉易其木瓦腐折破壞者。丹堊圻餒之弗飾者。新之。作始於正統十二年二月。訖功於七月。百需之出。公處之有方。民不知費。而廟宇落成。又視師生堂齋。退息庖藏之舍。有敝漏者。有狹小者。將次第完修。而改作之。郡博張璫司訓杜翀柳儀。以書求爲記其事。竊觀春秋。凡用民力。雖時且制。亦書見勞民爲重事也。當時魯僖公嘗修泮宮矣。而不經見者。以學校爲政之先務。雖用民力。不可廢也。今郡守張公新理廟學。而且民不告勞。其知爲政之先務者與。昔之爲吏者。類皆以簿書期會爲急。於教道人才。漫不加省。甚至崇廟貌以徼福於淫昏之鬼。侈私居以肆志乎宴安之樂。視公之政爲何如。公他政之善尤多。於此見其大者云。

游草堂記

景泰元年九月二十五日。僉都御史李匡約。予泊大理少卿張固。監察御史羅俊。同爲草堂之游。草堂乃唐杜甫子美避地蜀中時。裴冕爲作於浣花溪者。子美詩所謂萬里橋西一草堂是也。當時之草堂廢已久矣。而後世作堂以象之者。則彙彙不廢焉。至蜀獻王崇尙子美之忠賢。一新其堂。且刻子美蜀中諸詩於板。以示景行前哲之意。每歲時良辰勝日。蜀之衣冠士庶。與夫戴白之叟。垂髮之童。皆知草堂之名。而出游其地。人物車馬雜遝。道路至填溢。草堂不能容。由是草堂遂爲蜀中之勝迹。雖朝之指紳大夫。有事於蜀者。亦必至其地焉。予與李張羅四人者。皆以事在蜀。旣爲斯約。是日早出中和門。度萬里橋。循錦江西上。時霜降水落。江流之湍急。鏘鳴金石者。有以清人之耳。其洄澤之激碧。涵虛者。有以清人之目。與凡近岸之疏篁折筍。遠波之浴鳧飛鷺。皆足以娛心意而供出游之觀。西行可五六里。有橋曰遇仙。過橋有宮曰青羊。乃道家者言老子降於蜀青羊肆云。後人因卽其地以爲宮。宮西行約一里。過溪橋。扁曰草堂寺者。蓋因子美之草堂而得名也。寺西行僅半里。門扁曰杜工部祠。以子美嘗爲工部郎。故以是扁其祠云。入門有堂三閒。以奉子美之神。後有中堂三閒。以爲游者宴息之所。最後有堂三閒。覆之以茅。蓋象子美當時之草堂也。予四人者。相與觀子美詩刻中。有所謂雪嶺錦江者。蓋皆在今草堂之西南。然江山雖如故。而詩中所詠當時之物。蓋有不同者矣。方徘徊閒。四川藩臬都閫諸公皆至。具小酌中堂。有絲竹之聲。以侑酒焉。酒半而起。還過青羊宮。復畱小酌。至暮而歸。予惟子美草堂。不過江村一陋室耳。今去唐垂千餘年。當時之草堂已化爲塵土。而荆榛矣。後世作堂以象之者。年愈久而名愈新。是豈徒以子美詩之

工而凌跨古今。冠絕百世哉。蓋唐至中葉。爲女子小人蠱惑君心。竊弄權柄。紀綱大壞。逆賊橫發。黃屋出奔。四海潰亂。其人臣平日載高位。食厚祿。號爲親信而近幸者。率多頓顙賊庭。受其僞職。子美在當時。一布衣耳。亦嘗陷賊中。乃挺然無所汙。其視失節之臣。已不啻麟鳳之與犬豕矣。及其拔賊中。赴行在。肅宗拜拾遺。未幾。竟以直言去官。乃客秦州。入隴蜀。遂寓居草堂。適嚴武鎮蜀。奏爲檢校工部員外郎。或去或來。不離草堂者僅五載矣。夷考子美平日所作諸詩。雖當兵戈騷擾流離之際。道路顛頓凍餓之餘。其忠君一念。炯然不忘。故其發而爲詩也。多傷時悼亂痛切危苦之詞。憂國愛民至誠惻愴之意。千載之下。讀之者尙能使之太息而流涕。感慕而興起。則子美之忠。終始不渝。又如此。非特不汙賊中之一節爲然也。夫忠在人心。乃天理民彝萬世之所同。故後世慕子美之忠。則慕其爲人。慕其爲人。則併慕其所居之室。此子美之草堂。所以屢興不廢而名永長存也。且自子美草堂以來。以全蜀之盛。歷代之豪族富家。高薨巨棟。歌臺舞榭。蔽雲日而出風雨者。不知其幾萬億室也。今皆消滅泯盡。寂無名稱。獨子美區區一草堂。而爲後世之所景慕。興葺游觀愛賞之不忘。名將與天地相爲悠久。孔子所謂誠不以富亦祇以異者。子美殆近之與。嘗讀子美詩。有所謂百花潭者。今訪諸草堂之側。無此潭。豈歲久而湮塞歟。獨浣花溪在今草堂東北。卽青羊宮西行所過橋下溪是也。時同游者。布政使張惠。按察使茅惟楊。僉事劉福。都指揮李榮。周翥。廉恭。藩臬都閫共六人。其餘文武將吏甚衆。不能悉書。

榮養堂者劉君崇善養親之堂也。劉君爲監察御史時。凡任京職者。皆得分其在官之俸於故鄉以養親。劉君遂如例分俸於閩之建安。以爲二親之養。人皆以此俸朝廷之賜。而劉君之二親。乃得月受之。官廩以饗其賜。榮莫大焉。故名其二親所居之堂曰榮養。中外士大夫之能爲文辭。咸作序記詩歌以美之。聯爲巨帙焉。景泰元年冬。予以事在蜀。適自御史陞四川按察僉事。閒以其帙求爲之記。予惟人子難得者具慶。尤難得者以其祿逮養也。故曾子有曰。吾及親仕三釜而心樂。後仕三千鍾。不泊吾心悲。豈非以人子得祿逮養者尤爲難乎。劉君種學績文。既取進士高第。始仕卽得美官。身旣顯榮。其二親皆安好無恙。遂分俸以養其親。旣具慶而又得祿以逮養。人子之難得者。劉君得之。有曾子之樂。無曾子之悲者。其惟劉君乎。其御史秩滿。復荷國家舉推恩之典。封其父如劉君之秩。封其母孺人。榮名命服。皆朝廷之賜。而劉君二親身被其賜。又豈非榮養之尤大者歟。劉君今復陞秩僉事。自是以往。沐朝廷之寵錫。方源源而未已。其所以榮養其親者。容可量乎。雖然。劉君得祿秩以榮養其親者。皆由於秉公忠。勵清白。以盡臣節也。使臣節有一之未盡。則雖得祿秩以榮養其親。人將議以爲幸而致。雖親之心亦有不安者矣。劉君尙益勉其臣之節。而無所不盡。則其榮養其親者。不惟有以厭服於人之心。亦有以安慰其親之心。是堂之名。將傳之永久。而榮其親於無窮矣。

澹庵記

澹庵者。楊君伯玉退居之所也。伯玉發身科第。爲監察御史。爲按察僉事。臬官至參議。踐歷顯要者三十

餘年官榮祿厚。所欲可求。諳悉世味也多。其非澹也明矣。而以是名庵何耶。蓋澹者寡欲之謂也。伯玉爲士子時。已自以澹名庵。而自勵其學。迄今通顯。所至官舍。必寓以是名。而不易其志。誠以士君子立心之要。莫要於澹而寡欲也。寡欲則世味焉得以移易其志哉。且貴顯富厚。聲色滋味。皆世味之可嗜者也。古之君子。貴於時。富於時。雖勢足以備所聽之聲。窮所視之色。厭所嗜之味。而莫不饜之有節。用之有制。不爲富貴聲色滋味之所淫溺者。澹而寡欲也。使一有所欲。則凡世味皆得以淫溺之。天理滅。人心泯。將無以自立於世矣。此伯玉以澹名庵者。實君子立心之要也。伯玉起居出入。每顧名思義。而自警於心。故其官榮矣。恆以冲素自守。不知其爲榮祿厚矣。恆以簡薄自奉。不知其爲厚。所欲可求而遂也。於聲色滋味之不可無者。亦屬厭而已。未嘗窮於欲也。伯玉之立心於澹者如此。凡世味皆不得以淫溺之。其殆可以追蹤於古之君子歟。雖然。澹而寡欲。固可尙。誠能寡之又寡。以至於無。則進於君子一等矣。會當游伯玉之庵。尙論濂溪之至教。

慧庵記

慧庵者。僉都御史王公退居之室名也。公賦性正直剛毅。無絲毫詭隨人意。自其爲給事時。值國運中否。奸邪柄政。公首率諸同官。具章疏。廷論其蠱政誤國之罪。時有與奸邪爲黨者。不平其言。從旁沮止其論。奏公勃然。奮其忠直之氣。手擊奸黨以死。由是萬口稱快。而積憤消。衆正和應。而公道復。而公之名遂以聞於天下。今聖天子登大寶之初。賢公之爲首。自給事擢陞今職。適虜寇犯京師。遂命公董師以禦之。公

卽戎服鞭馬赴軍。號令區畫。咸適機宜。部伍行陣。應時整肅。將帥協謀。士卒思奮。乃出奇折虜寇之鋒。而奪其氣。虜旣奔北。因驅逐盡境而還。京師旣解嚴。而遠邇遂以寧謐。夫以公之聰敏機辯。過人百千等。而有爲之才。著於朝廷。著於軍旅者。卓卓如此。而乃以慧名庵何耶。蓋直者正道也。曲者邪道也。慧實直之別名也。昔漢武帝以汲黯面折其過。乃以慧目之。世因以慧爲愚。慧之稱。失其義矣。於乎。使漢廷之臣。皆如黯之慧。必能以直道輔其君。而武帝之治。其庶幾乎。惜乎直者易疏。邪者易親。曲學阿世。子乃至大用。而黯卒不得親幸。遂使武帝之政多疵議也。且公之擊奸黨。折虜寇。保京師。安遠邇。皆由其慧直之氣。發於中。而施於外者。無所屈撓也。以是名庵。不亦宜乎。公今董東南之漕運。且巡撫淮甸。固爲當時之急務。重任。竊以謂朝廷者。天下之本。今聖天子方舉羣直以收太平之功。行見不日還公於朝。又將以其直氣正道。輔成治效。則其豐功偉烈。不但如前日所就而已。若然。則益有以稱慧庵之名矣。瑄雖孱懦。亦嘗慕直道而行者。他日倘得游公之庵。尙當學公之慧。而請教焉。

忠勤堂記

秉盡己之心。謂之忠。效匪懈之勞。謂之勤。忠勤者。人臣事君之大道也。自古以來。股肱之良。勳戚之賢。曷嘗不篤此道。以建名節於當時。垂休光於後世哉。駙馬都尉趙公。昔在太宗文皇帝朝。以世臣子弟。有才行。被選擇。尙太祖高皇帝之賢主。歷事五朝。逮今垂五十年。或奉朝謁於左右。或持使節於四方。盡心效勞。忠勤之行。始終如一。日遂得以親賢簡在列聖之心。受命奉行。南京陵廟祀事。且兼掌都督府戎政。前

年北虜入寇。太上皇親征。公上章願奮忠效節。以殄除醜類。奉迎鑾輿。靖安邊境。今皇上若曰。小狄跳梁。行且電掃矣。南京祖宗陵廟所在。爲根本重地。駙馬都尉既奉祀事。且兼掌戎政。豈可又以邊事勞其行。遂不允其請。特降璽書。使仍理舊事。復以忠勤之辭褒其意。公既拜命於廷。乃取璽書忠勤字。大書揭於所居之堂。於以丕昭皇上褒諭之恩。且於其朝夕仰瞻敬止之間。有以接於目警於心。而勉其臣道之當爲。余嘗登其堂。公仰視大書。而語其故。因請爲之記。余惟公之勉盡忠勤者垂五十年。其聞譽固已表著於邦家。今茲璽書褒諭之詞。蓋卽其實以命之。公則拜寵光而增懼。揭堂名而加勉。其忠勤之節。彌久而彌堅者。又可量乎。公戚里富貴人也。乃能脫去凡近之習。卓然以臣節始終自砥礪。豈非聞古昔股肱之良。勳戚之賢。能篤於忠勤者而興起乎。其建名節於當時。垂休光於後世。固有所在矣。公尙益勉之。夫是堂也。其內之棲題棟宇。高麗深廣。可以肆几席而陳樽俎。外之奇花異木。紛葩羅列。可以娛觀視而供翫賞。余皆不書。獨記其名堂之大者。以爲公勉盡臣道之助云。

雙桂堂記

桂。佳木也。而秋芳。其花黃可愛。其香清而尤宜遠聞。近世之士子。薦名秋闈者。往往以折桂喻其一時之榮。亦楚辭采菊紉蘭之義也。寧陽王大經。王大縉兄弟。皆登山東景泰庚午科鄉貢進士。因以雙桂名其書室之軒。閒求爲之記。大經大縉之尊府。嘗與先君子爲同官。今爲順天府尹。大經其第三子。大縉其第四子也。京尹公之先世。多有積德。乃大發於京尹公。自科目進身。亟踐通顯。教行於家。諸子蒙詩書仁義。

之澤而講貫漸磨者有年。由是大經大經兄弟一舉而接武鄉闈。在他人不啻足矣。而大經兄弟乃以雙桂名軒者。蓋以謂吾之兄弟已得者。固若折秋桂之聯芳。然豈可以是自足哉。方將退修於是軒之中。於家庭之教。已知者愈精其知。已能者愈習其能。深翫潛索之久。強勉力踐之篤。必使詩書仁義之道。渾融於一心。散見於行實。宣著乎文章。則他日禮闈之試。大廷之對。亦惟據發吾之素蘊以應之。不惟掇高科。若升階之易。亦將有服庶官。措之事業。大有可觀者矣。若然則大經兄弟向之接武鄉闈者。又將齊名天下。而雙桂名軒之實。亦可垂之無窮。豈但若世之折秋榮而誇耀於一時者之可比哉。是爲記。

唐陸宣公廟記

有唐三百年。逢時建策。所以成翊戴弘濟之大功者。彙有其人。至於學術純正。事君以格心爲先。論事以行義爲急。隱然有王佐之才者。余於中唐獨得一人焉。陸宣公敬輿是已。當建中艱危之際。公居近地。竭忠盡以籌畫機宜。代王言以感召人心。惟提兵討賊。諸將是賴。而其運謀帷幄。再造唐室之功居多。是皆載之信史。天下後世所共知。余置不論。獨推公有王佐之才者。蓋三代之佐。皆以正君行義爲本。自漢以來爲輔相者。鮮克知此。而其所論不過人才政事。故無以清出治之源。明義利之分。以致主於王道。獨公之告德宗者。有曰。一不誠則心莫之保。一不信則言莫之行。誠信之道。不可以斯須去身。必慎守而力行之。又曰。民者邦之本。財者民之心。心傷則本傷。本傷則枝榦凋瘁而根柢蹙拔矣。夫知誠信不可不存。則心必正。知財利不可厚斂。則義必行。人君正心行義。使天下萬事粹然一出於天理之公。此王道也。惜乎

公言雖大。所告不合。入相未久。卽有忠州之行。而卒不得大行其志。遂使後世論唐之賢相。曰房杜姚宋。而公不與。夫豈知公有王佐之才。使時君能用其言。三代之治可待。豈復貞觀開元之盛而已哉。故善論相業者。當觀其學術規模之大小。不當以事功成與否而高下之也。史載公蘇州嘉興人。卽今之嘉興府。城北有公遺廟。世傳以爲公之故宅。前代碑誌。備載其事。景泰二年。知府事江西舒君敬上章。以公乃唐之名臣。忠節著於當時。奏議行於後世。其遺廟雖存。自昔以來。官無祭饗。宜量給官錢。修舉春秋祀事。以褒表忠賢。激勵臣節。詔從其請。又二年。爲景泰四年。舒君以書來求記其事。余惟世之爲守者。類以督辦爲能。而於世教風化所關者。漠不畱意。獨舒君卓然以表忠勵俗爲念。乃論奏公之事迹於朝。舉久缺之文。以秩登祀典。廟貌益崇。血食不泯。其所以爲天下後世人臣盡忠盡節之勸。而有補於世教風化甚大。是不可不記也。遂具述其事。俾刻之石。使千萬世知崇舉公祀。以樹風教於無窮者。自我天朝始。

華州重修廟學記

道之大原出於天。而備於聖人。吾夫子爲出類拔萃之聖。孟子推其功賢於堯舜。故以王者之禮通祀於天下學校。所以崇聖道。育賢才。開太平也。我天朝列聖相承。以道治天下。稽古王政。尤重學校之教。所在郡縣。廟學旣宏大。其初建之規。或有久而弗飭者。俾有司以時葺修。務崇祀育才。咸底其實。今陝西之華州。爲關右大郡。其廟學之建。歷歲滋久。棟樑瓦甍。侵陵於風雨。率多敝漏。今西安府知府西蜀閬中楊勝賢。發身太學。前五年來知是州。進謁大成殿。退視學舍。俱有弗飭如前所云者。大懼學政之墜弛。遂謀諸

同知李儲。瑣材用。集工匠。先徹廟宇。木瓦腐壞者。易之以新好。次及兩廡。俱葺理之。棟楹榱桷。蓋瓦級輒。悉壯固於前時。丹雘塲坊之飾。輝煌完堅。又命工畫歷代從祀諸賢像於廡壁。以及奉神之廚庫器用。靡不完具。天順元年。仍改作明倫堂。齋房會食堂。士子退修之室。由是廟貌尊嚴。士習有所。俎豆絃誦之風。延及州里。學正張玄。乃進諸生而告之曰。楊公先知是州時。祇承國家崇重學政之典。克修廟學。咸底完新。今楊公雖陞知大府。是不可以其去而無所記述。以沒其善。乃具其事。遣人來求文於予。將刻之石。予惟大莫大於道。吾夫子備是道。爲賢於堯舜之聖。我朝以道治天下。崇重夫子之道。俾通祀於內外學校。蓋欲以道育賢才而資世用也。楊守既知興學爲重。而爲師爲士子者。其可不知所重乎。則爲師者。必當以道率人。爲士子者。必當以道自勵。講是道。求是道。士子之彙進於明時者。咸以道忠乎國而愛乎民。或至裨大化。建大節。亦卓然惟道之與歸。斯學政大有實效。而於楊守興學之功。亦有辭焉。

讀易軒記

四川榮縣龔生文淵。嗜學好易。因取朱子警學贊首讀易二字。名其書室之軒。求爲之記。予惟讀易之法。朱子之贊備矣。尙奚待予言。請姑述所聞。爲文淵勸。夫畫前之易。奇偶之未形者也。伏羲之易。奇偶之已形者。今先天圖是也。自圖隱於異學千百年。世之讀易者。但知自乾坤以下六十四卦。文王之象。周公之爻辭。孔子之十翼而已。而於伏羲先天之易。則莫之聞焉。至宋希夷陳氏。始以義圖授穆修。修授李之才。之才授康節邵子。邵子乃大爲之發揮。然後知文王周公孔子之辭。皆本於先天之畫。由是易之本原復

明而朱子本義亦明乎此而已。若程子之傳雖未及乎先天之畫而義理精深包括廣大。朱子所謂邵傳義畫程演周經誠皆永著常式。彌億萬年也。文淵誠能肅容端席於斯軒之下。深探畫前伏羲之易。熟玩周孔之辭。精究程朱氏之傳義。又必以朱子之贊實體之於身心。則於讀易之法彼此交盡。庶乎有得矣。文淵其勉之。

平陽府儒學重修記

平陽爲山右之大郡。統屬三十有五。而郡學實人才風化之所自出。爲支屬之所觀法。爲郡之政固非一端。宜莫先於學政。今姜守德政三衢名家子。蚤游太學。出令上元。上元爲應天劇邑。素稱難治。姜守歷職九載。事無不舉。遂陞禮部郎官。又三年。陞知是府。莅任之初。進謁大成至聖文宣王廟庭。退見神廚學舍。率多敝陋。及有屋宇當立而未備者。因誌諸心。及半載閒。值時豐人和。乃區畫埏埴之具。斲削之材。以及髹牋百需。既合矣。於是就工先作神廚。次作明倫堂。作學門。以及師生宅居退室。繚垣道途。靡不完整。平直。又表頻宮之扁。覆以重屋。始事於天順五年二月。凡五閱月而工訖。學舍爲之鼎然一新。郡博生徒咸願刻石以紀其事。乃來求余文。余惟道之大原出於天。若古唐虞三代之教學。雖名有不同。而皆本於道。蓋道之明卽人倫之明。考諸載籍可見矣。自孟軻氏沒。堯舜禹湯文武周公孔子顏氏曾思之道不傳。歷漢唐以來。閒亦設學立經。置師弟子員。然道既鬱而不傳。而其所以爲教爲學者。徒矻矻於訓詁名物。口耳枝葉之淺陋。甚至雜於異端。惑於功利。汨於百家衆技之偏曲支離。雖有臨雍拜老。增廣生員。如漢唐

之盛。亦不過侈當時之觀美。卒莫能究大道之歸。而復隆古明道明倫之盛。至宋河南二程夫子出。始有以接千載不傳之統。於是發明性卽理也。以見道之大原出於天。表章大學中庸。明古人爲學之次第。造道之閫奧。以讀論語孟子而不知道。雖多亦奚以爲。周子以剛柔善惡中焉而已矣。論爲師之道。張子教人必欲變化氣質。復天地之性。至朱子會萃周張程子之學。以溯堯舜禹湯文武周公魯鄒之道。註釋四書。爲講學之本。又集小學爲大學之根基。以及詩易。既有傳義。諸經亦發其大旨。資治通鑑綱目。則理一天人。義兼巨細。由是教人之法大備。雖所入之途各異。而其要歸皆本於明道明倫。如唐虞三代之教。然當時講論極爲明備。而乃屢爲狂言所阨。竟莫能施其教於學政。達其道於天下。逮我皇明。統一萬方。道隆千古。內建國子監。外設府州縣學。而師弟子之所講習。小學四書諸經史之義理。皆本於周程張朱之說。以求堯舜以來千古聖賢之道。而前季訓詁詞章異端功利偏曲支離諸說。皆不得淆雜乎其真。由是濂洛關閩之學。得以備施於學政。盛行於天下。而大有以復古昔明道明倫之盛。今平陽郡學。人才風化所關。姜守知爲政之先務。而新理之事神育才。咸有所爲。師爲生徒者。其必仰思朝廷建學之意。篤志講明正學而無怠。庶幾人才所出有實用。而風化之美。亦延及於支屬。所謂明道明倫者。將不爲虛語。斯於姜守之興學與有稱焉。於是乎書。

陵川縣廟學重修記

陵川爲澤州屬縣。廟學自我皇明定天下。旣規建置。逮今歷年旣久。大成殿兩廡靈星門。以及堂齋諸屋。

宇皆穿剝弗治。事神育才。咸失其宜。知縣事任通。發身鄉舉。莅任之初。謁廟視學。大懼學政不修。乃謀及僚佐。以農隙時。斧斤山木。陶埴瓦甓。與凡作屋之不可無者。悉具焉。乃新大成殿。新兩廡。新靈星門。次及明倫堂。東西齋皆新之。棟桷覆瓦。圻饒丹碧之飾。壯固光彩。巍然煥然。皆有加於前時。以至神庫牲房。與士子會食退修諸室。悉皆增葺。始工於天順元年二月。訖於是年九月。教諭張瑄。訓導郭堅。陳祐。乃具興工竣事之迹。因進士張瓊來求記。將刻石以示永久。余惟教學乃爲治之本。自唐虞有司徒典樂之官。以職教事。至夏商周。學政寢備。於時有小學大學教人之序。灑埽應對六藝三綱八目爲教人之條。要其歸則在乎知性分之固有。盡職分之當爲而已。漢唐歷代以來。雖或亦有學校。求其如唐虞三代教人之法。則寥寥焉。蓋唐虞三代之時。聖道大明。故教人有其本。自孟子沒。道旣不傳。故教法失其實。至宋二程朱子。既有以接孟氏之傳。乃深探隆古教人之法。必由小學大學語孟中庸。以達夫六經之蘊奧。其歸亦在乎知其性分之固有。盡職分之當爲。其爲說雖明。值時柄鑿。而三君子之道。竟不得大行於學政。逮我皇明。當文運大隆。於是內外建學。而教人之法。一本於程朱氏之說。由是教人之法。大有以復古道。是豈漢唐歷代建學之可擬哉。今任尹大新廟學。於事神旣竭其虔。而士子之游於斯者。必循序以進其學。以求知其性分之所固有。以盡職分之所當爲。爲子必孝。爲臣必忠。俾大節卓然炳然。斯於國家建學爲有實效焉。於是乎書。

大寧縣在漢時爲北屈縣。屬河東郡。今爲隰州屬邑。其地僻在河山之間。土皆磽瘠。戶僅十里前之爲邑者。惟租賦簿書期會是急。漫不畱意於學政。以故學舍歲久侵陵於風雨。悉皆穿漏圯壞。且無士子退室。而師因以弛其教。士因以荒於嬉。大無以副國家崇教之意。天順三年二月。知縣王溥。生簿梁宏。乃儲積財木。用度既具。遂集匠役。卽學撤諸屋之敝者。大而新之。堂凡若干楹。齋凡若干楹。皆高敞宏廣。可以考業其中。是年四月。適山西右參政楊璿行。屬至縣謁廟。又命重修靈星門學門。及作士子退室三十間。廩宇十八間。學舍大小。由是悉皆完整。訓導劉期。具其興役訖事本末。來求文刻石以記之。余惟唐虞三代之學。其盛不可尙矣。自洙泗鄒孟之教微而道失其傳。至暴秦焚儒書。禁儒語。殄儒生。儒教旣廢。秦隨以亡。雖漢興數十年。猶以黃老爲治。而於唐虞三代之學政。莫之興舉。武帝雖曰表章六經。罷黜百家。置博士弟子員。而無其本。明帝唐太宗養老立學之具。雖可觀而無其實。至宋道學諸君子。講明隆古教人之法。雖極詳備。而不得行於當時。是蓋將有待也。洪惟天朝列聖相承。建極於上。立學於下。自京師延及遐壤。絃誦之聲相聞。學政之本末具舉。蓋將遠追隆古。彼漢唐之侈虛文者。奚足比擬哉。今大寧雖極僻陋。而學校教法。與通都大邑無以異。其學舍未備與敝漏者。大參既有以成其後。縣僚又有以成其前。將見教有成法。而可副國家崇學之意矣。是可書也。於是乎書。

一樂堂記

陝西清水縣儒學教諭廣文李生果。平陽解州安邑人。其中鄉舉依親讀書時。嘗來河津從余講學。及之

官清水之三年。爲天順六年。乃以書來曰。景迎父母就養。且有兄弟來隨侍。因於官舍中闢一堂。爲奉親之所。取孟子父母俱存兄弟無故一樂也之言。因以一樂名其堂。乞記其事。將以自警焉。余觀孟子又曰。仰不愧於天。俯不忤於人。二樂也。得天下之英才而教育之。三樂也。先儒林氏曰。此三樂者。一係於天。一係於人。其可以自致者。惟不愧不忤而已。今李生於可以自致及係於人之樂。皆不敢自居。獨以父母俱存兄弟無故之一樂名堂者何哉。蓋彼二樂者。皆聖賢之極致。故不敢自居。惟此一樂。幸而得於天。安得不以之名堂哉。然李生既以是名堂。必當盡其實以稱其名可也。其事親則必以古君子自期。先意承顏。左右就養。不但養其口體。又必養其心志。而諭之於道焉。其於兄弟。且敬且愛。必思父母之子。重於己之子。不以妻子之言而有閒。不以財利之私而有爭。期於詩所謂宜兄宜弟焉。夫如是。則於堂之名。庶乎有實以稱之矣。雖然。彼二樂者。固爲聖賢之極致。而李生不敢自居。然士希賢。賢希聖。亦學者分內事也。李生其必用力於顏子非禮勿視聽言動克己之目。朝斯夕斯而勿怠。則私可克而禮可復。庶幾乎仰不愧俯不忤之樂矣。李生教育一邑之俊秀。其必以所學之正。推以淑之。俾循小學大學之序。以及乎論孟中庸六經與凡聖賢之書。必涵養本原。思索義理。篤於實行。各因其資質之高下。使循循勉勉不已。則士子中豈無可與進於道者乎。若然。則雖於得天下之英才而教育之之樂。不敢望。亦知所從事矣。然余又有說焉。父母俱存兄弟無故。固天倫之可樂。使李生不能自致於克己之功。教人之方。則心德有未修。師道有未立。將貽誚於時。而父母兄弟之心。亦將戚戚然不寧。抑何以樂斯堂之樂哉。是以余因李生以一樂

名堂并舉三樂以告之俾知所警而自廣焉。

雙桂堂記

山西憲副定興李文英之長子翔鳳、次子鳴鳳俱以習舉子業。同中天順三年順天府鄉榜。復家居以俟禮闈大廷之試。文英因作堂名曰雙桂。俾二子居以日進其業。天順六年冬十一月文英調陝西憲副。道過余於河汾。因語以名堂之意。且求爲之記。余惟桂乃木之美者也。文英以雙桂名堂。蓋以比二子欲其盡知行之功以美於身耳。夫人爲萬物之靈。誠欲盡知行之功以美其身。亦惟求諸經典。大學語孟中庸以及濂洛關閩聖賢之書。所載大訓格言。學問思辨。致知格物。則可明其理。躬行約禮。誠意正心。則可履其事。爲翔鳳者。以是自勉。以率其弟。爲鳴鳳者。以是自勵。以企其兄。兄弟篤於知行之正學。沈潛翫索。勇猛精進。勤修於一堂之上。仰追千古之賢。至於用力之久。積彙之深。將於身心萬物之理。庶幾昭灼無疑。於是體而踐之。自人倫之大。以至事物之微。靜存動察。皆以一敬而貫乎其閒。則知焉行焉。將兩盡而可美其身。則所蘊者。磅礴深厚。由是發而爲文辭。皆自所蘊中流出。他日試禮闈。對大廷。文皆有本。不但高第不求而自至。又將可措之事業。以澤物。是豈若口耳記誦枝葉浮華無本之文。止於釣聲名干利祿者可比哉。翔鳳鳴鳳。誠不以愚老之言爲迂。而用力於斯。則所成就。必有可觀。而於憲副均期望進學美身之意亦不負。將見斯堂之名。可垂之永久矣。於是乎書。

薛敬軒先生文集卷之七

哀辭

愚村居士哀辭并序

愚村居士諱存善。姓劉氏。世爲江西泰和。人居士質貌魁壘。談議偉然。在鄉里。常斥其有以周人之急。尤重然諾。尙氣節。一出言。人卽信服之。由是人咸以鉅人長者稱焉。居士家故饒財。至元季。倣擾羣盜公行。剽掠鄉邑。苦之。居士慨然歎曰。大丈夫不能建功立業。垂聲萬世。猶當小設計慮。保庇一方。於是盡散其財。糾合鄉民。爲立約束。相與戮力禦寇。居士旣倡義。人皆愛護。室家勇於捍守。羣盜聞之。相戒避去。而不敢犯。鄉邑卒賴居士之謀。以克全於難。於時有司將上其勞而官之。居士愀然曰。吾豈以是徼利達哉。吾特盡吾心而已。遂固止其事。而卒不聞。逮國朝平定四海。蒐舉遺才。有欲薦居士者。甚衆。居士曰。吾少之時。猶無意於進取。今老矣。筋力智慮耗矣。復何能爲哉。諸君幸相愛。使得優游餘日於太平之世。幸矣。薦者意猶未已。居士乃辭去。城郭退居邑南村。葺茅爲屋。編竹爲籬。決渠以蔬。鑿池以魚。日與田翁釣叟。水陸上下。追攀往來。酣嬉歌呼。一以愚而自混於俗。因更其村曰愚村。而自號曰愚村居士。居士雖以愚而自屏於野。然士君子愈賢其愚。以爲不可及。及居士卒。鄉邑老穉垂涕曰。善人長者沒矣。吾其何從。居士

沒後若干年。當宣德二年。其孫某以進士第致位憲僉。哀其祖生而祿位不顯於前。沒而素行或泯於後也。遂述其事以書來。俾作哀辭。以發其潛德之幽光。余惟居士早能自立於鄉里。散財舉義。遏寇保良。其心固已厚於仁矣。及將錄其勞而官之。而復固止不從。其行又何篤於義邪。合仁與義。宜享榮名盛福於太平之世。而又堅辭薦達。退老丘園。蓋其讓而不居。蓄而未發。是宜大有以振耀於後嗣也。故憲僉公兄弟連中科甲。亟踐通顯。居士其可謂不死矣。遂作哀辭以撫其行。以彰其報。以傳於後云。嗟嗟居士兮。誰之賢如。稟茲魁奇兮。德音舒舒。惟義是急兮。不有積餘。遭時方艱兮。鷓鴣嘯呼。居士孔悲兮。聿良厥圖。倒囊出廩兮。糾茲義夫。式遏寇橫兮。以安里閭。事已則去兮。功豈我居。澹若無情兮。浮雲太虛。屬時休明兮。羣賢攸趨。獨守幽貞兮。以辭辟書。恬然退處兮。惟才之愚。野老爭席兮。鷗鳥與徒。婆娑水石兮。以樵以漁。何積之遠兮。其發匪徐。賢孫多有兮。乃德之符。居士雖亡兮。不亡者餘。流芬永揚兮。原末本初。嗟嗟居士兮。名誰可逾。

王處士哀辭并序

處士王君友直。祖通州三河人。世多顯者。逮元季兵作。處士從其二兄避地於堯。今爲寧陽人。處士渚實君子也。早失怙恃。移其孝於長。故事二兄如事二親焉。長失二兄。移其愛於幼。故撫諸孤如己子焉。蓄而未發。欲推其有於人。故賙卹鄉里。若己責焉。處士既行積於中。名孚於外。有欲以處士充茂才舉者。處士曰。凡吾所汲汲者。乃任吾性焉耳。豈以是釣譽于進哉。遂遠迹江湖之上。放意山水之間。以謝免之。及薦

者議息。乃歸鄉里。杜門卻埽。日以敦行義。飭閨庭。教子孫爲事。澹然無所慕於外。由是人皆服其真能安分者。而遂弗之強。其後處士之長子賢。今給事公。以科目得鄆陵校官。來迎養。處士既至。則懇懇以爲人師之難。教人所當先爲誨。給事公之師道立而克遂。成就後學者。蓋皆得於處士之訓焉。及處士歸。給事公後以官滿。便道省於家。而處士病矣。處士雖疾革。猶以善道誨諸子。而語不及他。及卒。宗族感處士之撫愛者。哭處士如哭親父母。而哀必盡焉。鄉里受處士之賙卹者。哭處士如哭其親戚。而傷必至焉。給事公既以禮葬處士。又立石以表於墓。及服除。入朝。擢授今職。嗚呼。處士其可謂有子矣。夫人之生也。丁亂離之時。鮮克保其生者。而處士脫亂厄。遭理世。受子孫之養。享太平之福者。四五十年。是則處士生無所歉也。世之人多行不義。至於玷身壞名者。而處士力於爲善。克享天年。終於桑梓。安於窀穸。是則處士沒無所愧也。人之子孫。或不能顯揚其親。至於親沒未久。而遂泯泯無聞。而處士有子若給事公。既表其行義於墓次。方且汲汲求名公文士之著述。以發揚處士之潛德於無窮。是則處士雖亡。無所憾也。嗚呼。處士其可謂不死矣。雖然。自處士觀之。始終皆可以自足。而給事公方駸駸於榮進。思欲更以所得之大者。以奉處士。而固已無及。則其抱終天之戚。曷有窮極也哉。余遂作哀辭。以述處士之行。以慰給事公之悲。以傳之久遠云。若有人兮。稟機專承顯。則兮導清源。生草昧兮。歷屯艱。徙儒邦兮。室家安。時休明兮。尙盤桓。篤孝愛兮。行寔繁。聞譽洽兮。來薦言。微利達兮。吾豈然。賦遠游兮。溯江邊。陟嶽峯兮。弄潺湲。倦游歷兮。乃言旋。桑麻圃兮。松菊軒。埽軌迹兮。門常關。篤義方兮。謹大閑。子翹翹兮。乃儒官。來仰養兮。遂承歡。悉誨

語兮謹師傅。樂未究兮返家園。乘清氛兮乃大還。卽窺窆兮卜高原。風蕭蕭兮白日寒。鳥獸嘯兮愁空山。林木悲兮凋蒼顏。石峩峩兮表新阡。發幽光兮潛德宣。子黃門兮感終天。養不滿兮涕洟瀾。嗟處士兮人所賢。善日遠而日邈兮。是亦可攀。

遷柩告先考文

洪熙元年十一月二十五日。孝子某。謹以牲醴頓顙流涕。告於顯考教諭府君之靈曰。自尊容奄遠人世。九月於茲。感時序之變遷。沸五內而興悲。曩以倉卒未卽歸葬。遂權厝於濟水之涯。逼側浮淺。實非神靈所宜。今以吉旦。謹啓攢窆。返柩於故山之陂。敢告。

祭先塋文

維宣德二年歲次丁未十二月甲寅朔二十五日戊寅。孝孫進士薛瑄。敢昭告於高曾祖考妣之靈曰。嗚呼。惟我先世宏大深厚。積善衍慶。以庇廕我後人。是以藐末不肖。得以蒙其福澤。由進士以發身。逮茲朝命屢降。將拜辭先塋而恭覲紫宸。區區松楸之戀。哀貫衷曲。敢因薄奠以僭陳。惟我先世幽靈冥德。昭昭不昧者。其尙鑒茲懇勤。

祭王太守文

宣德四年歲在己酉八月乙亥朔二十一日乙未。友生監察御史薛瑄。謹以時羞清酌之奠。致祭於武昌太守王公大惠曰。嗚呼。惟公質樸忠信。蓋出於天。處心制行。率由自然。在卑不競。在高不蹇。風紀清峻。人

觀侈焉。公任惟久。畏慎乾乾。率遠尤悔。名祿以全。及秉郡符。操持愈堅。臨事不撓。有嚴有寬。武昌繁劇。剗治實難。公爲數載。屬邑晏安。承接中度。交口稱賢。力冀遠騁。胡不少延。惟我與公。年齒絕縣。公不有挾。交好篤專。昔主公家。畱連半年。乃傾囊囊。沽酒割鮮。放懷許與。揮毫成篇。久別一會。笑語蟬聯。孰謂茲來。明幽永捐。進拜公柩。公不我言。風飄纓帷。塵凝几筵。追念疇昔。有涕汎瀾。返櫬何日。令子在前。義當匍匐。愧因職牽。有負交道。中情曷宣。文以自攻。酒寫忱悃。惟公有知。其尙鑒虔。

沅州禱雨告神文

維宣德五年九月二十三日。巡按湖廣監察御史薛瑄。謹齋沐以瓣香告於城隍之神曰。今茲之歲。自春徂夏。雨暘以時。稻之早者已穗而可穫矣。而晚稻山田之類尤多。皆焦然困於秋雨之愆期。重念小民。皆賴是以爲生。若悉槁死。則國之租稅。神之棗盛。尙無以給。又何免私室之寒饑。惟國家之所以棲神以宇祀神以時者。以神能保庇一方之黔黎。逮茲旱虐日甚。民縣縣有望於神。而神之聰明。胡不聞知。御史來按是方。敢以誠告神。其無爽明靈。膏雨賜以時施。謹告。

維年月日。謹差沅州知州李果。以清酌之奠。告於明山之神。凡山之高大表爲一方之望者。爲其能興雲雨也。明爲沅之傑然挺出荒服。以神爲之主也。宜乎祀典代承而莫敢去也。逮茲秋旱爲虐。禾將盡槁。而民無以處也。神司膏澤。胡吝不與也。御史臧誠遣告。神必惠然許也。玄雲勃興。斯須雨天宇也。四野大穰。欣欣歡子女也。民獲報祀。進牲醑也。吹擊管鼓。式歌且舞也。御史當修神之名。播中土也。尙鑒。

維年月日。謹差沅州衛經歷岑團。以清酌之奠。告於漢車騎將軍張公之神曰。赫赫炎靈。四百率土。孰非其臣子。自東都之政不綱。致四海之流橫潰。時豈無智謀之奇才。而皆遑恤逆順之至理。獨將軍之先後數奮忠勇而效之以死。雖千古而名永長存。聞者孰不爲之興起。彼姦雄之擾擾於一時。遺臭至今其未已。固知是非之定於將來。豈有力者之所能彼此。相陰陰有肅之叢祠。臨宛宛東流之沅水。在祀典昭然而有稽。豈荒怪淫昏之可比。茲闔境之雨澤愆期。特致詞而祈以清醴。尙饗。

維年月日。差知州李果。以清酌之奠。告於城隍等神曰。聞者秋旱爲虐。一何極也。是用有所於羣神。羣神聽果不惑也。有雲鬱興。一雨滿三日也。晚稻將槁。神賜以實也。山稼將枯。神賜以粒也。小民將饑。神賜以食也。百用將竭。神賜以給也。官宜卽罰。神賜以釋也。凡百有心。感神德也。何以報神。選肥潔也。詞以侑之。神來格也。神惠其繼之。承事永無斁也。尙饗。

辰州府告神文

維年月日。巡按湖廣監察御史薛瑄。謹以香燭。告於城隍之神曰。國家之所以立祠宇。修祀典。俾所司行事。以時以飭者。以神能福一方之民。而除其所疾苦也。今年夏。是府境內不雨者殆逾旬月。山稼將盡槁死。而下田亦無以成實。若更十日不雨。則百穀將盡。國賦無以供。生民無以食。神之性醑亦無以給。民之疾苦莫於是乎極。御史雖愚無知。猶動念於懷。豈以神之聰明而不加恤。抑長民者之弗告邪。果神有待而匪亟也。御史來與神言。早已甚矣。神其導迎休徵。沛布時澤。除去厲虐。化爲豐碩。則一方侈神之威。感

神之德。神饗厥報爲無忝。而民之事神亦無斁。尙鑒。

維年月日。監察御史薛瑄謹差辰州府同知余存諒。告於漢伏波將軍馬公之神曰。公生爲名臣。沒爲明神。是皆一念忠誠之鬱積。夫豈聲音笑貌矯僞者可得而比倫。御史少讀公傳。見公行事磊磊落落。嘗偉公之爲人。及領節南按。乃得拜公像於壺山之陽。瞻公廟於辰水之濱。屬茲辰境夏旱。百穀將槁。民用憂辛。御史平生以正直自處。豈以是而濫禱於淫昏。獨念公之忠賢。爲祀典之崇重。其精爽烈烈。固宜與山川之氣流通而常存。是用敢以旱告。詞以侑禋。公其妙運化機。大雨茲土。以濯辰人之焦槁。以慰御史之懇勤。尙鑒。

代陳御史作焚黃文

維年月日。行在雲南道監察御史陳詔。謹以清酌之奠。及行在雲南道監察御史敕一通。告於考監察御史之靈曰。考以孝弟謹厚之行。特達敏絕之才。爰自國初。蒐舉遺逸。弓旌之聘。賁及丘園。靈時歆起。應召歷官。雖止佐邑。推心遠大。以故隱德餘慶。是蘊是崇。是衍是施。被及我後人休者廣矣。而男詔以孱愚之資。荷生成之力。克勤克瘁。以育以誨。考業邑庠。發身科目。遂任行在雲南道監察御史。實有風紀之榮。每念音容。悟發寤歎。逮茲三年。遭逢聖天子。以孝治天下。率祖宗之憲章。舉追榮之盛典。以謂人臣之盡忠於國者。蓋必有教於其家。寵光之施及其身者。又必上延於其始。由是推恩以行在雲南道監察御史之秩。贈及先考。以孺人之命。命及今夫人。恩浹幽明。慶兼存沒。是皆先德之懿所致。其曷敢忘。謹以前敕一

通。用仲告祭。若聖天子褒嘉之意。則具載於訓詞。尙饗。

祭魏希文文

維正統四年歲次己未閏二月十九日。山東按察司僉事薛瑄。以清酌之奠。致祭於友人魏希文之靈曰。於乎希文。好古信道。力慕聖賢。顛沛困阨。心不少遷。憶時永樂。俱客玉田。始獲君友。我惟少年。君不有挾。惠與周旋。我卽君室。至夕乃還。君來我屋。竟日畱連。相與誨告。皆古格言。乃開我愚。乃砭我頑。往復十載。交道篤焉。逮我別去。君心如煎。徒步送我。握手拳拳。逾三十里。解袂長歎。寧知一別。幽明永捐。今來君里。密水菜山。俯仰疇昔。中情慨然。問君妻子。旅食寒單。仁者有後。其不有天。欲尋君筵。道里隔縣。遙設一奠。君其鑒虔。尙饗。

祭少師江時用母夫人文

某氏太夫人之靈曰。惟靈生於茂族。歸於名門。內範有自。懿德斯存。高堂安其孝敬。中閭底於肅溫。作配君子。參大藩而資其內助。貽教厥嗣。官少師而鍾其慶源。夫何命服在躬。方享全福。而大化遽及。歸於九原。悲傷貫其宗姓。惻愴動於里鄰。令子旣奉命而奔其哀訃。所司復準式而營其壙墳。掩幽堂之石以銘德。樹隧道之碑以刻文。存沒榮哀。誠鮮與倫。某等忝與令子接迹。朝紳並陳。誠以致奠。庶有格於几筵。尙饗。

薛敬軒先生文集卷之八

碑

漢伏波將軍馬公廟碑

古有功蓋於一時。名垂於後世。享生民之祀於無窮者。豈非大丈夫抱非常之材識。本之以忠誠。行之以悠久。而有以通神明。貫金石。達古今。而無閒者乎。漢伏波將軍馬公援。天與魁奇。器識宏邁。當漢統中微。新莽竊命。四海橫流之日。乃遠迹邊陲。混身田牧。時人弗之識也。獨其兄況謂曰。汝大才當晚成。且良工不示人以璞。宜從所好。公亦嘗曰。大丈夫爲志。窮當益堅。老當益壯。公之所立。固已見於此矣。及其盡散財蓄。志清時難。遨遊隴蜀。擇所適從。知囑起草竊之徒。皆酣衆富貴於一時。不足以計安生民於萬世也。遂謁光武於洛陽。一見之頃。卽以恢廓太度。同符高祖稱之。因委質臣事。效忠戮力。以匡復漢室。若聚米之開示山川。銅柱之威服殊俗。皆公之奇謀偉績。其他蕩除猘靖。維調贊翊之策尤多。中興之功。公無與讓。及天下底定。朝廷清明。雖剖符受封。爵列五等。榮寵並極。而公不以是自佚。嘗奮不顧身。志欲效死邊疆。以盡臣節。及武陵羣蠻撓邊。公遂請行。兵至臨鄉。蠻卽摧破。師次壺頭。伐功未就。而公卒。先是有以兵事聞於帝者。時遣來監軍之人。素有憾於公。及至軍。而公已歿。遂厚加誣毀。以快其讎。而薏苡之謗亦興。

焉。嗚呼。若公之所立。卓偉奇特。駕一世之橫鶩。挺百代而獨出。猶不免巧夫之唇舌。他尙何言。議者又以不從充道。而從壺頭。爲公失計。夫曠日老師。而費糧。與捷徑出奇。以制勝。二端利害甚明。而公之慮審矣。設使如或者之言。從充而進。又安能必保蠻寇之無齟齬乎。是又不得謂公失計也。夫以宗均之常才。矯一節以入羣蠻。猶足以致其震懾來服。若公少緩死。當有他策。以致蠻矣。又豈云云者所能測哉。夫其輟晦自養。散財濟難。公之大志也。鄙斥姦豪。獨歸眞主。公之大識也。奇謀勇烈。光輔中興。公之大功也。不懷宴安。以死勤事。公之大節也。世之人臣四者有一焉。猶足以名當時。而垂竹帛。公乃兼而有之。而又本之以忠誠積久之心。宜其功蓋一時。名垂後世。而血食無窮焉。向之謗者。風休電滅。漠無蹤迹。曾何損於公之忠賢哉。今辰卽五溪故地。距公歿垂千年。而野夫女子。猶知道公之威名。在在有廟。以祀公。斯又足以見忠義之感人心。不以古今而有閒也。我皇明大秩羣神。公廟之在辰者。獨登祀典。有司以時行事。無敢怠弛。人有水旱疫癘。則禱焉。廟故有亭。或以爲神出游之所。址存而亭廢。辰人合志興構。并他屋宇門牆之弗治者。悉完理焉。余少讀公傳。嘗壯公之爲人。及往來武陵江中。親見所謂壺頭山者。壺頭距辰水行可一日至。彼亦有廟。而修祀事於辰者。便於人之瞻依云耳。廟亭旣新。余遂刪取公之大節。俾辰人刻之。并係以詩曰。矯矯馬公。惟志之偉。志在功名。氣不少萎。貧堅老壯。公言則然。懷奇蘊樸。罕識其賢。雲乎鬱鬱。雷乎震震。紫色揮聲。炎輝斯燼。公晦於時。爰牧爰蓄。飈氛九縣。顧瞻安之。曰述曰囂。狼貪豕飽。鄙不少留。聿求漢道。來覲眞主。應對疏通。謂帝大度。高祖則同。遂委臣質。遂效臣節。聚米討羌。悍鹵蕩越。四方底

平人懷安娛。公不晏佚。許國以軀。滔滔武陵。蠢蠢雜種。梗化撓邊。負險恃勇。公曰。茲役老臣馳驅。堅請於行。秉節舒舒。不驚不亟。既安且式。試兵臨鄉。蠻卽摧辟。扼於壺頭。匪公之尤。天少須假。孰測厥猷。公雖沒世。因則成事。乃招乃來。羣蠻無貳。云胡巧夫。讒言朋興。豈不暫翳。事久滋明。迄茲千載。有顯愈赫。名徹聽聞。功載史冊。壺山之南。辰江之漭。公蹟如新。公廟惟古。逮我皇明。祀典秩申。行事以時。委在守臣。惟公忠精。厥德不爽。疫癘早滂。應求如響。民感公惠。欽服國章。廟亭完構。其敢廢荒。乃圖永久。乃磨良石。我纂其詞。爲示無極。

絳州大成廟碑

臨川王汝積。以儒官陞知山西之絳州。始至。進謁大成至聖文宣王。顧瞻廟貌庫陋。年久桷腐撓。大懼弗恭。明祀及薦。更釋奠薦獻。周旋迫於狹隘。且風雨穿漏。不足以揭虔安神。益深悚惕。遂下北山之材。聯爲巨筏。順流而至。擇土埏埴。瓦甃完堅。百用具備。衆工齊作。撤去腐壤。易以新好。廟舊以閒計者三。廣而爲七。厥制崇高峻整。宏闊深邃。巍然堂座。聖像益尊。顏曾思孟。四公作配。十哲位次。序列左右。禮殿旣成。改作從祀賢儒兩廡。而擴大之。門宇堂齋。率皆壯麗深廣。克稱頒宮之度。工旣訖功。釋奠備禮儀之盛。士習有絃誦之勤。風化之美。延及民庶。汝積乃進諸生而告之曰。昔周元公有言。夫子道高德厚。教化無窮。實與天地參而四時同。我聖朝所以極尊崇之禮。天下通祀而罔閒內外者。其不以是與。惟是絳學祀典。人材所關。汝積大懼學政墜弛。有愆彝憲。是用協力一新。材用民功。皆國家有所興事。底功惟祇若。崇祀

育材之意而已。迄茲有成。誠不可不知所自爾。諸生考業於斯。師法先聖。當以唐虞三代學校士習自勵。勿以俗學詞章聲利汨其心。尊道統之正。黜百家之非。居仁由義。竭忠盡孝。庶幾身有古人之學。才爲用世之良。斯實聖朝建學之意。諸生既旋唯而退。學正劉革等遂以其事來徵文。將刻之石。余謂汝續能新廟學。以祀神育才而不自以爲功。又勉諸生以正學。是可書也。爲之銘曰。惟茲廟學。爰始爰作。厥制陋庫。禮儀靡度。亦窘風雨。圯漏弗支。神罔攸格。士習以嬉。時維汝續。文儒是職。有蘊有施。潭潭秩秩。適求民牧。陟俊拔尤。大廷有命。來守郡符。守來自東。人士咸喜。不以崖威。而尙豈弟。進謁先聖。廟貌罔稱。退謀厥役。靡安靡定。遂鳩羣材。遂興陶埴。百工獻巧。齊心一力。撤舊益新。丹堊黼黻。翼翼禮殿。有赫斯崇。周廡堂齋。悉廣其宇。神有安安。士有常處。工告訖功。汝續有云。茲惟成憲。祇命在臣。乃進多士。敢有誠告。師是聖賢。篤茲正道。明體適用。允罔不休。高視萬古。忠賢可逮。彼哉俗學。實頗實側。治己治人。鮮不爲慝。惟慎所始。惟端所趨。舍曰無知。不有聖謨。士感守言。匪獨我惠。神人具依。守無我替。乃纂其事。乃來徵辭。麗牲有石。刻以永垂。

濟南府重修舜廟碑

有大聖人之道。而功被於天下萬世者。固宜爲天下萬世之所崇奉。如濟南府之有舜廟是已。舜耕於歷山。史記以山在河東。今濟南府歷城縣亦有歷山。故後人因以立舜廟焉。夫歷山之地不足深辯。獨舜以大聖人之道。功被天下萬世。人得而知之。則濟南立廟以致崇奉者。夫豈過哉。正統初。瑄以菲才。濫官山

東憲司嘗進謁廟下。因追仰聖道於數千載之上。今去濟南垂三十年矣。方以老病退居河汾。山西憲使王允郡人也。以書來曰。吾濟南故有舜廟。歷年滋久。木瓦腐漏。殆不可安。神揭虔。天順二年。都察院左副都御史年富巡撫山東。因謁神廟。見其圯剝之甚。退謂藩臬官僚曰。舜大聖人也。是郡之人。既立祠宇。以致崇奉。而乃弗治。如是幾於慢神矣。盍圖所以新葺之。於時歲值少豐。不可興事。又二年。爲天順四年。歲既連稔。民生亦紓。於是都憲洎藩臬以濟南知府陳銓。才可集事。俾董其役。銓量材計工。皆取之帑餘在官。而民不知擾。自殿寢廊廡以及外門次第俱新。宏廣壯固。皆有加於前時。且擴其隙地。繚以周垣。樹以名木。幽邃清肅。允稱神栖。始事於是歲之正月。踰月而工訖。由是官民小大咸愜瞻依。斯役也。實乃崇奉聖神。而有關於世教。不可無辭以紀其事。敢勾文俾刻之石。以垂諸後。瑄因念數十年前。既嘗謁聖廟。而追仰聖道。今茲之舉。固宜有言。夫舜之所以爲大聖者。以其爲人倫之至。而精一執中。乃萬世道統之源。禹湯文武之君。皋陶伊傅周召之臣。孔曾思孟以及周程張朱之聖賢。雖行道明道之功不同。而其相傳之法。實皆溯其流。是其功被天下萬世者。曷有窮極哉。今聖朝方以有虞之道治天下。薄海內外。咸底休風。然則是廟之新。匪徒崇聖道於往古。實有以仰若聖朝爲治之意。是誠大有關於世教也。遂書其事。俾刻之。

東嶽泰山廟重修碑

東嶽泰山之神。故有廟在山之陽。朝廷有大典禮。大政務。則遣使告焉。廟屋歷年既久。類多圯漏。弗治。先

是守臣嘗奏請修建。而未克底完。天順己卯。泰安州復以其事達之濟南。因以上請。詔允修葺。於時都憲年公富。方議興役而去。左副都御史賈公銓繼來巡撫。乃泊巡按藩臬協議。既擇有幹幕職以董其役。復俾濟南知府陳銓。月一往以綜理焉。銓始至泰安州。以謂修葺嶽廟。所以祇若朝命。致謹大神。然尤當以省民財。重民力爲本。財匱民疲。事亦非可。因詢及守廟者。具言數十年所積禮神之物甚富。遂遣人持市木之巨細。與其他修屋之不可缺者。及既合而匠役皆在官之人。而農民不知有役。銓既綜理有法。董役者亦因其意。不亟不徐。功日就緒。始事於天順庚辰秋七月。次年辛巳春三月訖工。殿宇周廊。門觀繚垣。悉皆完治。不陋於前。不移於後。咸願刻石以紀其事。山西按察使王允濟。南人也。因以書來求文於瑄。惟孔子有曰。必也正名乎。夫明則有禮樂。幽則有鬼神。其理一也。然則祀神之道。其可不以正名爲先乎。如嶽鎮海瀆。其在古昔帝王之世。皆以名山大川稱之。初無封號之加。蓋以其爲天地儲形萃秀。神氣流通。能興雲雨以惠物。能出財用以濟民。故雖載在祀典。而不可以加封號。自前季以來。道學不傳。幽明之理。不明於天下。邪誕詭妄之說日作。於是有封五嶽爲王爲帝者。有封五鎮爲公者。有封四海四瀆爲公爲王者。而又各加以美號。夫嶽鎮海瀆。其形峙而流。其氣神而靈。古禮五嶽視三公。四瀆視諸侯。而乃崇其號。人其神。名旣失正。神豈顧享。洪惟我太祖高皇帝定有天下之初。卽稽古祀神之典。乃頒大明詔旨於嶽鎮海瀆諸神曰。考諸祀典。知五嶽五鎮四海四瀆之封。起自唐世。崇名美號。歷代有加。瀆禮不經。莫此爲甚。今依古定制。凡嶽鎮海瀆。並去前代所封名號。止以山水本名稱其神。仰惟詔旨所載。大洗前訛。隆

復古制。其所以達幽明之理。嚴上下之分。允宜表正斯世。垂法將來。而爲萬古不易之大典。孔子所謂正名者。於斯見之。猗歟盛哉。今東嶽泰山之神。爲衆嶽冠。聖朝旣正其名。秩其祀。而廟有弗治。又俾所司以時修葺。而撫臣洎藩臬得綜理其役如銓者。不竭民之財力。而克底完新。皆可謂祗若朝廷之丕休顯命。而致謹於大神者矣。遂序其事而銘之曰。一理宰幹。二氣互根。清浮無際。濁墜斯存。柔行剛峙。川洪嶽尊。惟此泰山。造化鍾萃。寵從太虛。磅礴厚地。匪魯邦瞻。實衆嶽最。其蓄罔測。其施靡量。玄雲守石。甘雨八荒。功旣載溥。厥報宜章。有廟在陽。奉命新葺。重臣是承。守臣是職。民不匱勞。事底完集。殿宇廊觀。聳立縈迴。高下中度。不驚不卑。神氣鬱鬱。流通在茲。昔古山川。明祀有體。夫何前季。封號洊起。儕嶽於天。紊三公禮。逮我聖世。道復古隆。斥絕僭誕。率循大中。嶽鎮海濱。悉正其名。惟岱宗神。神稱允格。迄茲有役。咸願石刻。述理纂辭。以示無極。

韓城縣重修學碑

韓城卽古之韓城。襟帶梁山大河。爲今陝右大邑。邑學大成至聖文宣王廟及學舍。創建旣久。皆有弗治處。河南湯陰王鼎。以貢士來知縣事。旣勤庶務。尤重學政。自大成殿以及兩廡神門神庫神廚。有圯漏者。悉完理之。重作明倫堂東西齋。俱增舊兩間。擴明倫堂後地作退堂一所。生徒退室。悉修葺焉。土木蓋瓦。級磚繪飾。壯固鮮彩。經始於天順五年正月。至八月訖工。廟學旣新。又申舉教條。以勵生徒。咸願刻石以紀其事。乃來求余文。余惟爰自隆古神聖御極。未嘗不以學政爲先。蓋以人之性出於天。而性卽理。理無

不善其氣質則有清濁之異。故不能皆知其性之所有。而全之以復其初。聖神君師億兆。必施治教。俾氣質清濁不齊者。皆有以變化之而復其性。若唐虞之司徒典樂。夏商周之庠序學校。皆教人之政也。是以當時治化。人才極其隆盛。時至東周。學政不修。有若孔子之大聖。雖不得位以行其道。而其教人之法。曰仁曰性與天道之類。則皆本於復性。故顏曾思孟皆宗其教而與乎斯道之傳。及孟子沒。性學不明。漢唐閒雖或建學立師。而教人之法。則異乎古矣。至宋周程張朱。眞儒繼出。大有以發揮堯舜三代洙泗教人之法。雖亦不得施之學政。而性理以之大明。我皇明統一寰區。大興文治。內自國都。外薄四海。莫不建學立師。其學政則純用聖賢教人之法。治化人才之盛。聿追隆古。夫豈漢唐所能髣髴其萬一哉。列聖相承。咸重斯道。數申敕天下。以時修舉學政。勿俾廢弛。今韓城王尹。祇若上命。克舉學政。如此爲生徒者。其深體聖朝隆古教法。究濂洛關閩之學。以上溯洙泗堯舜禹湯文武周公之道。必由經以窮理。窮理以復性。爲臣盡忠。爲子盡孝。與凡職分之所當爲者。無不盡斯。於人才風化。有裨於萬一。而於王尹之興學與有辭焉。於是旣敍其事。復詩以系之。曰。惟梁有山。惟邑有韓。韓城之學。王尹是完。完之伊何。蓋瓦棟宇。神有妥栖。士有息處。釋奠考業。旣飭且釐。媚學之子。惟道是資。道體於穆。曰命曰性。性該萬善。全畀神聖。神聖在昔。極建教敷。唐虞肇迹。典樂司徒。延及三代。教法隆備。聖賢相傳。千載一致。蓋人之稟理。一氣殊明。誠兩盡。斯復其初。夫何前季。性傳晦昧。學名則同。學實非是。逮我皇明。道際嘉亨。學建內外。復性是崇。茲韓之校。有成斯役。磨石纂辭。以勛無斁。

墓誌銘

明故奉議大夫山東按察司僉事崔公墓誌銘

山東按察僉事崔公卒於官。將返葬故鄉。其弟理奉公行狀。請銘於其兄同官河東薛瑄。謹按狀公諱碧。字仲玉。永平昌黎人。大父彥名。祖妣齊氏。彥名有隱德。鄉人嘗被兵無食。彥名以其家積穀千餘石貸與之。食兵息。取券焚棄。一無所責償。父得母齊氏。生四子。長卽公。次叔琮。次叔璘。次卽理。公少有美質。大父母父母特愛之。遣充縣庠弟子員。習經史舉業。中永樂十五年鄉試。登辛丑進士第。宣德初。拜交趾道監察御史。立事舉職。強幹不屈。籍籍有聲。逮國家推恩例封。父得文林郎交趾道監察御史。母齊氏封孺人。時公大父母俱高年安好無恙。父母又皆顯受褒錫。公嘗衣繡歸省於家。祖子孫三世一門壽慶。光顯鄉邦。以爲榮。正統紀元。調行在江西道監察御史。明年爲廷臣薦擢。陞今職。分巡部屬。剔濯奸垢。振挈紀綱。事以無墜。竟積勞成疾以卒。正統四年十二月二十三日也。享年四十又九矣。先是公有疾。因念太夫人已卒。大父父母俱年老在故鄉。不得朝夕見。愈憂思不置。遣理往迎之。旣而大父暨御史君俱弗克來。獨母孺人至。公輿疾迎郊外。相持感泣不已。疾遂增革。公初娶張氏。早卒。贈孺人。再娶劉氏。泰州同知浩之長女。封孺人。公存日。嘗命理之子善聚後已。公歿。理如其命。善聚甫四歲。幼不任事。理奉公柩歸。以正統五年四月初二日葬於故里司家莊鵲鳳山之先塋。銘曰。胡豐其始。胡嗇其終。命實爲之。嗟嗟乎崔公。

墓表

汾陰阡表

河津古河東地。我先世自得姓以來。卽居之。鮮有徙寓四方者。故族屬蕃大。不下數十百家。歿而葬於汾陰之南坡者。封樹纍纍焉。我先考教諭公。旣卒於河內官次。其年冬。孤子瑄扶柩還鄉里。明年爲宣德元年。遂以正月十一日葬於南坡之先塋。前三日。自他窆啓先妣齊氏柩。以禮祔。又二年。瑄服除。入朝。授廣東道監察御史。瑄竊惟先公先妣鞠育之勤。教戒之嚴。慶澤之深。而藐末不肖。乃有今茲之光榮。先公先妣旣相繼卽世。而欲以微祿致滄澍之奉。固皆無及。是以獨居靜處。追慕音容。展轉歎歎。痛心泣血。而莫知所措。因念昔之君子。追惟其親而不能自己者。必有纂述之詞。勒之金石。以發揚先德。若柳子之紀其先侍御歐陽公之表瀧岡是已。顧小子瑄。曷敢自附於前賢。然念大恩之莫報。抱終天之大戚。而所以表述先德之心。出於悲思繾綣之餘。而不能自己者。亦竊冀其萬一焉。是用撫取先公歷官行己之詳。敍次如左。先公生於元季。甫七歲。先大父卽授以四書。先公誦習。晝夜不輟。比十餘歲。皆能暗記。不漏一言。旣而以選拔爲縣庠弟子員。益肆力於經史子集諸書。時國家肇運。興勦百度。以元季科目文字過於冗衍。而古賦乃詞章之流。遂定新式。皆從簡約。而古賦易之以論。文格旣新。士多病於舊習。而卒莫能變。獨先公以經理充爲舉業。卽合其程度。先進老生皆推讓之。而後學小子有所述作。學官儒師必悉令先公爲

之刪潤焉。洪武甲子，行科舉。先公以書經應山西鄉試，一往卽領薦。明年爲洪武十八年，試南宮，授北平眞定府元氏縣儒學教諭。年二十九矣。時建學未久，士荒於習。先公以身率之，時束以教條，比及九年，而諸生行業可觀者衆。官滿赴闕，太祖高皇帝詔吏部擇儒官可備顧問者。吏部以二十員名上，而先公與焉。每旦禮官引入，敍立於丹陛內，百官退乃退。太祖高皇帝嘗御奉天門，命諸儒臣講五經。先公講書大禹謨，音暢義明，克動宸聽，及罷，流輩咸推道焉。凡三閱月，仍授河南開封府鄭州滎陽縣教諭。其先校官以教無成績罷去。先公深念教法墮弛，無以稱育才意，乃擇諸生之秀者，列之別室，爲定程法，以嚴督之。餘亦因其資，使進於學。先公率以五鼓而作，終日爲諸生盡所以誘勸磨礱之道，或至日中未食，亦不知倦也。如是者五年，諸生業已就緒。以北方罷學，改官四川馬湖府平夷長官司吏目。其地古西南夷，去中國絕遠，時瑄輩皆幼。先公攜持以行，水陸閒關萬里，旣至其處，則人皆夷獠雜類，野無良田，率芟山而火之，側耕危穫，苟以給食。江流迅暴，每盛夏水漲，則舟楫不通，商旅殆絕。官無廨宇，俸無儲積。先公不以其地僻惡介意，欣然結茅以居，資以衣食，克己守約，一毫無所私於人，或至食不繼，桑日怡如也。先妣復能薄衣食，安貧淡以助其廉。於上下以賄交者，一切閉絕。惟於民事則盡心焉。若飢渴之於飲食，故人雖夷獠亦皆心服而樂道之。永樂紀元，詔諸改官者悉從舊。明年冬復任。滎陽舊生卒賴成就而資任用者，比迹相望。任滿移官玉田，勤誨如在元氏。滎陽時固無怠，人才亦不減於昔。九年爲永樂十七年，徙教鄆陵。丁先大父憂去官。繼丁大母憂，家居五年，起復爲河內教諭。到官未久，仁宗皇帝御極，朝京師，歸道病，輿

至任卒。洪熙元年三月初一日也。享年七十有一矣。嗚呼。我先公自讀書應舉入仕。一聽之自然。未嘗少屈以干人。歷官三十餘年。教人治民。必勤必盡。不以秩卑祿薄。而分外有一毫僥冀心。是雖不得大行於時。而操持施措。亦可槩見矣。先公天資謹厚。簡澹寡欲。幼卽不妄嬉戲。在庠序。端坐終日。出入造次。以禮自持。交友未嘗至於變色。每休假歸。入里門。恭謹過甚。見老少。咸接以敬讓。無毫髮矜傲態。鄉里父老。至今談先輩在庠序有行義者。必舉先公爲首。其在元氏。迎大父母就養。極恭順之道。俸廩餘資。一錢尺帛。皆歸之大父母室。而已無私積。於宗族尤極念恤。於子孫尤極慈愛。事上恭而不諛。處僚友和而不比。奉身極儉。一裘襪或數年不易。食取充腹而不屑於滋味。衣取雅潔而終身無文繡。器用麤樸而不求華巧。衾褥用大布爲之不厭。所至廨宇。因其故而無所增飭。雖或支撐隘陋。風雨不蔽。而居之裕然。囊篋不問有無。惟於爲學爲教。則汲汲若不及。至白首皆然。與衆會集。或縱酒喧嚷。已獨默然靜處。若無所聞者。性不喜酒。飲不過三爵。教人以身先之。每日常以雞鳴而起。未有至旦而出者。教瑄輩爲學。以正心修身爲切要。瑄少性急易怒。嘗大書於窗曰。暴怒猶有亦宜戒之。瑄自是痛自克治。而不敢恣。戒家人衣食以省儉。或見飲食稍豐。必顰蹙曰。汝等不知農作之艱難。而乃如是。其爲學。以仁義道德爲本。析經義。以先儒氏說爲主。爲文詞。以理勝而不爲浮靡。論道。以三綱五常爲大。而異端邪怪之說。無以干其思。嗚呼。我先公處心制行。爲學之正。自少至老。無所矯易。又可見矣。重以大父母義方之訓。培於前。先妣姚德之賢助於內。故居易履順。保節遠尤。永終官祿。歸祔先塋。誠所謂善始善終者矣。而小子瑄又以庚子河南鄉試。

忝登辛丑進士第。始仕。卽叨清要。所謂鞠育之勞。教戒之嚴。慶澤之深。誠不可誣。而罔極之恩。旣無所報。用敢僭摭。歷官行己之實。流涕頓顙。表於墓次。以明我先公承休於躬。衍慶於後者。尙未已。而我後之人。當恪恭孝思。永永服膺先德。以求無忝所本云。

趙孟周墓表

有於其親歿之久。於凡祀事。旣以時修。又念其親之生平行義。著於家庭。著於鄉邦。歷歷在人耳目者。不有所託以圖不朽。將與歲月俱遠。終於泯泯無聞矣。故上自公卿大夫。下至士庶。而欲顯揚其親之善行於無窮者。皆出於降衷秉彝。不能自己之良心。夫何閒哉。粵觀漢唐宋以來。凡官居野處之人。欲顯揚其親之名者。必求立言之士。述其行實。勒之金石。以耀無窮。所託以圖不朽者。宜莫過於是。君子尙之。蒲州趙仲博。其始得姓爲趙城人。遠祖有世昌者。始家於蒲。歷漢英良甫三世。至君卿。爲仲博曾大父。大父文簡。生孟周。卽仲博父也。仲博於孟周旣歿。能修凡祀事不息。又欲圖垂其親之名於永久。乃走河津。進薛氏之庭。拜而泣。且言曰。仲博蒲之編氓也。雖世居田里。而凡供民事無敢後。今竊有請焉。吾先人孟周。承先祖之業。日桑月益。家計日饒。然能不以利自專。人有匱乏。不足於用者。卽斥其餘以周之。無吝色。有貸其物不能償者。往往折其券。性尤孝友。謙恭。在州里。接少長貧富。一以和不立崖岸。有纖毫乖爭意。與朋友交游。酒食過從。懽笑無倦。全交道始終。至白首無閒言。又嘗游天下名山川。陸走陝洛襄鄧梁宋鄭魯之郊。舟汎江漢洞庭彭蠡淮泗之波。老而歸。子婦羅列家庭。養無違意。杖履東阡南陌。朋儕童稚追隨。尙

伴嬉游以樂其樂。竟以壽終於永樂八年正月十九日。葬於城古庄之先塋。逮今四十年矣。雖報本追遠之祀。勉修其一二。尙念其行義。著於鄉閭在人耳目者。未有所記。恐遂湮沒無聞於後。懼莫大焉。竊聞先生篤古而文者。倘略其愚且賤。而憫其區區不能自己之心。辱賜之言。以表諸墓。庶先人之善行有所託。而名永長存。幸莫大焉。余按仲博之言。其父孟周爲蒲之善人。行義於歿世。仲博既修凡祀事。不忘。又圖顯揚其父之行於不朽。所謂降衷秉彝之心。於仲博見之。遂爲次第其言。以表諸墓。俾其子孫皆知孟周所以承先貽後者。一本於善。庶有以繼承不息。益衍其善於永久云。

故贈兵部主事陳先生墓表

浙江富陽陳復初先生。以宣德十年十月初十日。卒於河南汜水之官次。又十五年爲景泰元年。始克表於其墓。先生諱元。復初其字也。其裔出陳太丘之後。自漢晉隋唐宋以來。陳氏仕於其世者。代有顯人。以家牒弗存。不能詳其世次。至先生曾大父子高。大父仲遠。父思明。比三世皆積善行義於鄉里。種而不食其穫。施而不求其報。思明尤讀書好禮。及生先生。有異質。知其必有立也。遂遣游庠序。從良師友。以開發涵養其心性。時未幾。學識驟進不凡。流輩咸推服。以爲不可及。後以明經入太學。益考業於明師儒。且得盡友六館天下英俊之士。聞見日益富。聲稱日益著。值選舉行有成者。分教四方學校。先生遂有山西沁源儒學訓導之命。先生既至官。喟曰。官無崇卑。顧職所盡何如耳。且天下莫大於道。訓導爲人師。師道在焉。道有不修。何以盡其職。乃充其學。以道自勵。早夜懇懇。以啓迪諸生者。皆經籍所載。聖賢所傳。三綱五

常之道。異端誕妄不經之說。無以干其念。由是學子翕然從其化。山右稱善教者。皆推先生爲最。後調閩之興化縣學。兩任江西饒州府河南鄭州郡庠。皆以舊職合四任秩滿。陞汜水教諭。又九年。將去而陞秩。諸生狀其善教之績。上章願留以卒業。詔許其請。竟以疾卒於官。享年六十六矣。汜人慕先生之德教者。不但庠序諸生。又延及里閭齊民。既葬先生邑東龍泉鄉之原。復畱其家占籍於汜焉。先生既有美質。又充之以正大之學。歷教五郡邑。將三十年。無倦之心。始終一致。所至成就人才。隨其器質。弟子名薦書入官。躋仕途著聲蹟於世者。林立相望。若先生可謂無忝於師道而能盡其職矣。先生信道既篤。安於所職。無絲毫自貶求人知薦意。性復樂易寬大。接人洞見衷裏。坦然明白。不爲防諺崖岸。苟賢矣。雖貧賤禮之有加。苟不肖。雖顯者亦視之漠如也。居家不問有無。尤喜賓客。每客至。卽呼酒延款。連日夜不厭。急於行義。嘗斥其餘以賙貧乏。人有死無葬具者。卽助之棺槨。其友葉全寄先生以白金百鎰全亡。召其子以金還之。鄉人孫景原戍邊客死汜水。先生遣人護其骸骨并妻子以歸。嘗道經睢州逆旅張貴家。見庭槐羣烏護巢哀鳴。問其故。貴因家貧無以自活。已售此槐以給食。伐者將至。烏懼傷其雛。故哀鳴若此。先生問槐價幾何。卽如其數。探囊金使還市槐者。貴舉家羅拜。槐得不伐。羣烏卽噤不聲。先生平昔舉義甚多。此特其一二耳。他不能盡述也。嗚呼。先生自其曾大父以來。皆積善行義。隱德弗耀。至先生始以文儒起家。益衍先世之慶。又位不滿德。而以教府厥子。其長子鑑。克守家業。次子銓。登進士第。今爲兵部職方司主事。三子鈍。中鄉試禮部乙榜。任大名府儒學教授。銓爲主事三年。例得推恩於其親。於是敕贈先生如其

子之官。其配呼氏。贈孺人。光寵赫然。勳於一時。先生雖沒。亦可以無憾矣。夫惟所蓄者久而深。故所發者遠而大。蓋其理有必然也。余少從先君子典教榮陽。其地介鄭汜閒。余往來嘗抵宿其館舍。先君子沒於覃懷官舍。先生又遣人致賻。復遣銓從余學。故余知先生履歷行實頗詳。用敢序次其事。表於墓左。以明先生所以承休於前而貽榮於後者。皆本於德善之積。不惟其子若孫當永永嗣服無替。而世之人亦得以有所觀覽興起焉。

薛敬軒先生文集卷之九

箴

謹言箴

誦謹言之訓。習謹言之事。將三十年。夕悔其失。寤寐惶汗。而且或復然。殆將漸流於放。終不克謹以速尤。召愆。汝縱不自愛。獨不念先人遺體之重。降衷秉彝之全。誓自今始。語不妄發。保厥中之靜專。至此而猶飾虛詞。尙循故態者。當指正於蒼天。

慎行箴

思厥一身。或動或靜。日可見者。皆謂之行。行有天則。至明至正。云胡小子。操履靡定。語默或流於羣妄。應接復牽於多病。是以德業不至於崇廣。馳騫將迷於蹊徑。其自今始。如夕惕以乾乾。欽聖謨而非禮勿動。

懲忿箴

在損著象。懲忿有教。樊昔辨惑。孔亦以告。蓋觸物易動。惟是爲先。苟勃然而妄發。必焚如以自煎。德既有乖。生亦受賊。速禍召尤。變故匪測。我思我心。本自湛如。云胡震撼。弗克寧虛。制之有法。必懲必戒。懲摧其暴。戒思其害。惟暴若苗。惟忿若根。根除苗翦。事我天君。天君旣安。百職從令。怒或當然。因感而應。應己而

休。無迎將留。雖曰顏樂。亦以是求。

改過箴

繼善成性。天然之中。安行者聖。繼失曷從。降自衆人。人有舛駁。自心及身。靡過不作。所貴士賢。希聖希天。希之之要。改過爲先。如思之邪。如事之失。旣炳其然。必去必亟。過去善復。日進可期。尤謹再作。迷復斯迷。藐予小子。仰賴先業。氣質庸愚。過兼隱白。亦云有覺。厥治不剛。頻復厲矣。徒發赧惶。恐遂頑然。將不省憶。天畀謂何。而乃自棄。因是發憤。自訟以箴。風雷宜法。大壯宜欽。日悔日改。期無則止。希之之功。勿替終始。

存理箴

惟天生人。惟人有理。理爲之何。物則是矣。圓外竅中。五性渾全。感而遂通。四端秩然。貌色手足。口鼻耳目。以及衆體。至微之物。直溫重恭。止肅明聰。或動或靜。咸有厥中。身之所接。萬事五品。其理昭如。各有程準。凡此衆善。悉備吾身。放之則失。操之斯存。存之之要。明誠有教。明炳其真。誠踐其道。惟此二者。功不可偏。循之勿失。士賢聖天。

持敬箴

一刻之謹。心在理存。一刻之怠。心放理昏。是知敬之一字。乃直內之樞機。養性之本根。昔在伊洛。道繼孔學。開示羣迷。敬爲要約。其曰主一無適者。欲人必專其念。而不雜於多歧。其曰整齊嚴肅者。欲人必極其莊而不失於怠墮。斯實内外交養之法。持循之久。自不容私。其及門之士。有曰惺惺法者。蓋必有事焉而

提撕於頃刻。有曰其心收斂。不容一物者。蓋中虛無物。而必極其靜一。偉哉晦翁。統承二程。小大之學。一以爲宗。慨彼前修。年代云往。豈無瑤琴寶匣。絕響在末小子。氣質愚頑。七情內蠹。百妄外干。雖曰爲學。徒侈華博。究厥本真。久矣戕斲。一日大覺。前爲可羞。蓋昧往訓。放心靡收。念彼寸膠。黃流可碧。顛末旣陳。期守勿失。

慎微箴

眇忽之間。其動曰幾。究其所極。千里斯遠。是以作易君子。觀羸豕而著象。因地雷而謹微。言發乎口。雖捫舌其靡及。行達乎遠。知駟馬之難追。惟兢兢焉。日嚴乎斯語。庶遠悔尤。而天理靡虧。

大理箴

惟左執法。廷尉象焉。稽古之職。士師庭堅。官曰大理。歷茲有年。其名不一。其事則然。蓋天之公。陽開陰闔。立法憲天。仁柔義遏。不率典彝。或過或惡。天討以施。低昂斟酌。乃有準臬。職斯常刑。讞厥當否。則歸廷平。廷平攸執。時惟鑑衡。鑑灼隱伏。衡持重輕。持照兩得。克允克明。罰當民服。氣協休徵。明刑弼教。聖所欽恤。死者弗生。絕者弗屬。而居而官。宜何警肅。勿徇貨利。勿任憎欲。勿偏縱釋。勿好刻酷。有一於茲。靡平靡燭。數紀瘵官。齋痛飲毒。譬火銷膏。辜亦已速。邈哉千載。乃有良臣。釋之定國。持公體仁。曰民不冤。曰無冤民。功光簡冊。慶及子孫。高山宜仰。景行宜遵。小子述誠。敬勸我人。

銘

悅心齋銘

人孰無心。心孰無悅。悅匪其正。爲心蠹賊。大哉孟氏。儒林之綱。悅心著訓。式炳以彰。其悅伊何。曰理曰義。理則在物。義則制事。二者匪人。實降自天。得之而悅。天乃斯全。卓卓沈君。齋居云作。扁曰悅心。惟孟之學。豈無肥旨。祇飽以酣。弗專弗從。道腴是耽。齋旣作止。銘亦書止。日居月諸。勿替終始。

勿欺齋銘

動而未形。此心之幾。幾有善惡。人莫吾知。吾旣知矣。其將何爲。賢有明訓。而曰勿欺。蓋欺之爲義。不專所持。雖曰好善。若有所疑。雖曰去惡。若有所廢。謂之勿者。庸以禁止於斯。故知善可好。如嗜甘肥。知惡可去。如厭糟醢。果專專於是道。復念念而無違。則眇眇之善端。可以擴之於天地之涯。美哉張君。令德是頤。勿欺名齋。顧以自規。庶幾匪懈。賢可士希。

惜陰齋銘

大化茫茫。斯物斯億。人爲物靈。所貴者德。德原於天。心會其極。其體密微。其用周悉。云胡氣拘。所得者失。顧茲百年。曾不瞬息。弗亟循之。將遂迷溺。所以往哲。晷景是惜。惜之惟何。明誠致力。明則道通。誠則道立。從事二者。遑遑汲汲。朝復一朝。日復一日。靡閒毫髮。靡懈頃刻。於茲卷舒。於茲語默。憶彼前修。瞻望靡及。有卓君子。希慕軌則。爰作齋居。爰圖進益。古訓是名。古法是式。由學而仕。勤勵夕惕。豈曰道悠。由近可卽。豈曰高山。由下可陟。敢贊一言。以勸無斁。

恆齋銘

有海之瀕。有岱之麓。挺生儀公。質負魁篤。公始知學。旦夕孳孳。顧此彝德。思厥保持。乃博其方。乃要其統。雷風法義。有恆師孔。恆者伊何。悠久常然。立心行己。篤此一言。遂揭齋楣。出入是覩。若鑒神明。若臨師父。爰自筮仕。屢擢屢陞。官有內外。齋無二名。夷考厥迹。昭哉歷歷。持鐸教尊。剖符民輯。溥彼旬宣。江漢是式。允於出納。喉舌是職。晚亞南宮。朝推耆碩。啓沃經筵。忠忱彌積。載承恩詔。縣車故鄉。乘化消息。孰不榮光。繫公之賢。惟恆之幹。夷險一德。終始靡倦。公雖逝矣。名永長存。風流弈世。子子孫孫。孝思維則。安則安做。匪曰高山。恆齋是仰。

思儀堂銘

昔有令伯。祖母成之。更相爲命。以孝以慈。百世之下。人感其詞。嗟哉陶君。災屯少罹。怙恃兩失。子然孤遺。皤皤祖母。收拾保持。就燥避溼。驚癩渴饑。孫笑祖悅。孫號祖悲。祖孫一氣。同安共危。逮茲成人。伊誰之思。惟祖母氏。邈不可追。乃作高堂。省貌在斯。溫溫笑語。宛宛容儀。致慙則著。勸息無違。令伯是式。合聞是垂。銘以告之。永久勿墮。

孝思堂銘

有巍者堂。伊誰居之。居惟王君。式是孝思。思之云何。曰恃曰怙。匪怙曷生。匪恃曷顯。生我顧我。實惟我尊。怙既先亡。恃罹艱屯。乃續乃紡。乃誨乃養。憫茲藐孤。天德無爽。歲月既邁。孤亦有成。天胡不弔。恃亦先零。

遂蘊遂發。亟踐顯達。祿位日增。孝心彌切。惟此一身。父母肢體。獨享光榮。孝養已矣。而獨何心。安厥敷遺。深居是堂。其有弗思。思之之至。如臨庭戶。如聞笑語。如見喜怒。振振王君。孝思孔昭。有通於天。有徹於朝。帝曰孝子。予惟汝錫。錫汝考妣。如汝之秩。御史孺人。有格其神。一世之屈。萬世之伸。王君振振。孝思維則。載銘其堂。永久弗忒。

存誠齋銘

惟天地萬物。實理爲之樞機。本厥一源。諒無不齊。自稟賦之雜揉。紛虛僞之交馳。爰有元聖。乃曰無爲。斯太極之全體。兼動靜而靡違。降聖而賢。必由保持。視聽言動。敬以主之。羣邪退伏。誠斯不虧。溫溫李生。往哲是希。爰居爰處。左箴右規。弦韋是服。絲桐是揮。沈酣古訓。詠歌古詩。斯須動作。靡敢怠墮。望慾止水。如防如隄。庶邪妄之可閑。冀存誠之在茲。美厥志之名齋。述法言以勵之。

世厚堂銘

惟人秉德。惟始不忒。篤邇行遠。仁里孔昭。云胡昧者。楚越人己。弗惻弗恫。薄亦甚矣。古有君子。家以厚傳。渴猶己致。危猶己顛。乃設寒漿。大飲行旅。乃縣杙索。大濟險阻。其事雖微。其心則仁。能以類推。旁達無垠。爰作高堂。銘曰世厚。式昭於先。庸戒於後。給事鍾慶。世德是遵。譬之水木。培根浚源。惟厚弗替。乃福所自。視此堂名。欽於永世。

贊

獬豸贊

疾惡者天地之正性。而人心之所鍾。云胡淪胥其類。不知其醜。而甘與之同。有物於此。匪兇匪虎。非龍非熊。名曰神羊。曠世莫逢。乃能觸回邪而無避。合輿論之至公。則彼臧否莫辯者。覩其狀類。寧不爲之愧生於中邪。

又

爾形不類。爾出不世。是蓋稟陰陽之精英。具天地之正義。心之靈。既鑑物以靡差。角之剛。復觸邪以無避。宜其端居而百怪惴伏。正視而羣小悚畏。故能與麒麟同游。騶虞作配。擅執法之英聲。爲國家之美瑞也。

無庵贊

老氏之無。乃無而無。吾儒之無。乃無而有。有非聲色形迹之可求。雖無聲無臭。而實爲造化之樞紐。其人也。寂然不動者。無聲臭之可窺。實萬象森然已具之淵藪。卓哉無庵。心學是潛。所以啓大易之關鍵。識濂溪之指南。其取號也。雖無而實有。其體道也。雖虛而實涵。斂之則約。施之則覃。或翱翔乎武選。或正職於大參。凡其著赫赫之顯迹。何莫非體立而用兼。及其老而休也。因人事之乘除。悟陰陽之消息。斂疇昔之敷舒。爲所卷之微密。順大化而怡然。乘白雲以高適。凡其貫始終而不二。由其合有無而爲一。彼以天地爲幻妄。以萬物爲塵迹。空諸實有。而爲反道悖理之邪說。以聾瞽斯民。蠱害正道者。又豈可以比擬無庵之真識邪。

王先生畫像贊

其貌充然。其色溫然。精心玄思。探索乎岐黃之編。高外化焉。其爲術也。通變審密。而鄉閭稱焉。殆將與張長沙、孫思邈、劉素異世而同傳也耶。

畫龍贊

能大能小。能屈能伸。能顯能晦。能雨能雲。蓋至陽之精。爲萬物之神。故其功在天地。功在庶品。功在生民。可敬可畏。可瞻可仰。不可得而馴。非聖者之至德。又安足以比倫。

歸一老人畫像贊

其貌充而全。其神粹而完。識之正。旣超軼乎習俗。情之適。復笑傲乎林泉。是宜享簡穰之多福。樂期頤之永年。然則其孤標時服。固丹青之可髣髴。而靈臺春意。豈筆畫之能盡傳邪。

拙巢先生畫像贊

質純氣和。理明心定。篤信好古。拒邪閑正。有言有行。以淑後人。美哉君子。輝光日新。

劉紹僉憲畫像贊

東吳之精。中朝之英。粹乎其質。確乎其聲。察其操。金百鍊而愈固。望其儀。鶚獨立而無朋。推其心。蓋欲使善惡之著白。要其歸。實欲觀惠化之流行。是誠所謂有守有爲之君子。而可爲新進晚生之儀刑也。

御史張勉夫贊

東吳之英。中臺之傑。身也繩直。心也玉潔。持所見。不隨俗。以低昂。蘊其奇。每因事而發越。宜其勁節挺然。忠言剴切。身雖歷乎險夷。功乃歸於潤澤。是猶一鶚之高齋。異乎鷺鳥之桑扈也。

薛敬軒先生文集卷之十

雜著

胡氏族譜後

僉憲高唐胡公。閒出其族譜示余。俾余書其後。且曰。譜吾作也。吾家故有譜。且載世次行蹟。吾少時猶及見之。後更散逸不存。吾懼先系先德。將遂湮沒無傳。於是斷自吾之所知者。創爲是編。以傳諸家。庶後之人得有考而知所自。又曰。凡譜所以兼載世美。以示諸後也。吾自束髮讀書。歷官中外。僅克有立。而幸不失所守者。皆先德之遺也。若是譜不作。則是自專其休而忘先德之大。豈仁孝之心乎。此吾勉就是編。而不敢以蕪陋爲解也。余受而退閱其編。觀其序宗系。則綱紀不紊。論世德。則言行不遺。因仰而歎曰。自宗子之法壞。而人莫知所自。往往親未盡而相視若塗人者有焉。幸而士大夫家。閒有譜牒以紀其世。則又或遠附顯者以自重。厚加潤澤以失真。是二者皆過也。僉憲公則不然。其紀世次。旣明白可考。論先德又典實可推。若是以傳之家。公之子姓宗族。一覽之頃。親疏之序。世德之懿。舉在目前。莫不興其孝弟慈良之心。高山景行之念。凡行義藹然於一門。德善相承於悠久者。實有賴於是編也。詩所謂孝子不置永錫爾類者。公有焉。若公之氏族官閥。憲僉劉公序之備矣。茲不復贅。謹擇其一二可言者書於後。以復於公。

云。

書何原明先生傳後

先生三衢之常山人。諱初。字原明。姓何氏。非非齋其號也。自少以穎睿聞。既從學於鄉先生三江兄弟。卽以窮理正心克己爲務。且兼習舉子業。嘗兩舉不第。益自奮勵。復從程觀先生學。易。遂以易經領鄉薦。任仁和教諭。既而元季俶擾。文教墮弛。乃解官歸鄉里。日以讀書談道自樂。值國朝開運。首訪遺才以任民牧。遂以先生爲江州湖口丞。時軍興多故。邑里凋瘵。先生調給安定。焦勞匪懈。以治狀驗白。陞知韶州府仁化縣。其便民之政可紀者尤多。既而丁外艱去官。遂以疾家居。篤意教事。及海內平定。詔天下建學養士。且求學行老成者爲師。遂起先生爲巴東教諭。先生年益高。學益充。德益進。聞望彰灼。近乎湘藩。遠徹朝右。因召至闕下。預修書傳。會選書成。將歸。上考之。欲授以近地便養。遂除開化教諭。祿之終身。先生學既有得。尤善開發人。故後進出其門。爲名士顯宦者甚衆。嗚呼。夷考先生之學之傳。遠有端緒。蓋三江先生出。許文懿公之門。而先生則三江所授也。其淵源既遠。至於經旨之微。性理之奧。宏博精密。蓋多其自得。故其處心制行有足動人者。至於著述雖多。要皆根本義理。而不爲浮靡之習。若先生之爲人。可謂有古士風矣。及觀其爲佐令。爲教職。則其學又以驗諸行事。事可考。然或者猶謂此特先生小試耳。使得盡推其所有。則其效當不止是。殆未可知也。距先生沒後二十五年。其孫永芳以進士知邵陽縣。時未幾。民翕然化。固知其學宦家法有所自。意者先生之未克盡施者。永芳殆能繼其志而擴大之乎。其端兆矣。永

芳持其祖家傳求言以發其潛德。遂芟取先生之學之行。見諸行事有未究。而將有待於後人者。書以還之。

河崖之蛇

瀕河居者爲予言。近年有大蛇穴禹門下巖石中。常束尾崖樹顛。垂首於河。伺食魚鼈之類。已而復上入穴。如是者衆年。一日復下食於河。遂不卽起。但尾束樹端。牢不可脫。每其身一上下。則樹爲起伏。如弓張弛狀。久之。樹枝披折。蛇墮水中。數日蛇浮死水之漩隈。竟不知蛇得水物。貪其腥羶。不舍而墮耶。抑蛇爲水之怪物所得。欲起不能而墮也。余聞之。喟曰。是蛇負其險毒。稔其貪婪。以食於河。所恃以安者。尾束於樹耳。使樹不折。則其生死猶未可知。惟樹折身墮。遂死於河。此殆天理。非偶然也。且使蛇得水物。貪其腥羶。不舍而死。固可爲怙強貪不知止之戒。使蛇爲水之怪物所得而死。亦可爲害物必報之戒。蛇惡物所不足道者。但其事有近乎理。故書以告來者。

捕虎答

辰故五溪地。山險多虎。近時尤劇。往往羣行搏噬。無閒晝夜。旣飽肉得氣去。愈縱橫嚙躍。無所顧畏。居民行旅。悉苦其暴。縣吏以聞於朝。命下總戎逐捕之。時宣德五年閏十二月也。三日有以虎在近郊來報者。總戎率將士往。遂殺三虎。明日遣將士往。又殺一虎。連兩日。四虎就殲。行者相賀於途。居者相賀於室。將吏以其事來白於予。且曰。辰之四境。若四虎比者。蓋不知多少也。總戎方發近衛兵。將包羅山谷。搜剔其

窟穴而芟夷之。期醜類盡絕乃止。夫除惡安民。亦繡衣公之志也。敢併以爲賀。予愧乎其言。則應之曰。夫利五兵。結網罟。除山澤惡物爲人害者。自先王之制已然。況我皇明。奄旬萬姓。仁柔義濡。期使覆載遠邇。無一民之不獲其生。而僻茲蠻方醜類。稔惡乃爾。則擲刃網繩之施。其可後也。不兩日而四虎殲。期畢舉而羣惡盡。是皆將吏能用總戎之令耳。予逢掖者。無能爲也。何賀之敢當。然予於是蓋有感焉。彼皮毛之斑炳。爪牙之銛利。無休乎山林。搏噬民物以自肥者。人皆知其爲暴而可殺。如前所云者是也。抑又孰知於此有不皮毛。不爪牙。不山林。號爲靈物。而剝人之脂膏。以自養者。暴不下於彼而可惡也哉。況彼之暴者。蠢然強悍。力有餘而志則否。野夫小子。有能高其垣籬。謹其出入。猶可避其患也。此則以饕餮之資。挾翕張之勢。或柄一隅。或統一軍。或任一邑。無閒癘殘。窮富悉被其朝吞夕噬之苦。是又孰得避之哉。且彼異類也。爲暴自其性。然此則同類也。而至於斯極。予又不知此誠何心哉。然彼之暴。汝總戎職也。行見悉皆殄除。而民物全安矣。此則予職也。國家憲紀。素以完具。方圖所以少施其方略。以覃惠澤於遠邇。將吏之賀可休矣。衆乃相屬以目。屏氣促武而去。

貓說

余家苦鼠暴。乞諸人得一貓。形魁然大。爪牙銛且利。余私計鼠暴當不復慮矣。以其未馴也。繫維以伺。候其馴焉。羣鼠聞其聲。相與窺其形類有能者。恐其噬己也。屏不敢出穴者月餘日。既而以其馴也。遂解其維繫。適覩出殼雞雛。鳴啾啾焉。遽起而捕之。比家人逐得。已下咽矣。家人欲執而擊之。余曰。勿庸。物之有

能者必有病噬難是其病也。獨無捕鼠之能乎。遂釋之矣。已則怱怱泯泯飢哺飽嬉。一無所爲。羣鼠復潛視。以爲彼將匿形致己也。猶屏伏不敢出。旣而鼠窺之益熟。覺其無他異。遂歷穴相告曰。彼無爲也。遂偕其類復出。爲暴如故。余方怪甚。復有鷄雛過於堂下者。又亟往捕之而走。追則來者過半矣。余之家人執之。至前數之曰。天之生材不齊。有能者必有病。舍其病猶可用其能也。今汝無捕鼠之能。有噬難之病。真天下之棄材也哉。遂笞而放之。

跋李氏族譜後

余觀吉水谷坪李氏家譜。自唐西平忠武王晟第七子憲。爲江西節度使。卒於官。子游奉其喪葬宜春。因家於宜春。五世孫唐自宜春徙居吉水。今谷坪李氏皆唐之裔也。逮今廿餘世矣。而其高節懿行。孝子忠臣。奇童碩士。顯宦偉績。出於李氏之族者。炳燿磊落。前後相望。今其雲孫茂復。以明經登進士第。官大理丞。繼西平之往烈。衍谷坪之後裔。未見其極也。不觀諸江河乎。出岷峨行乎無垠。入乎無門。巨派支流。浩博綿演。愈遠而不息者。以其源之洪也。西平有大功於唐室。殆岷峨其源乎。不然。何其子孫流派若是之盛也。嘗觀世之君子。遑卹其本而惟末之求。譬之沼沚尋尺之水。決而引之。不終日而竭矣。尙何望其綿延不絕。愈遠而愈盛乎。然則李氏有譜。不惟其子若孫知源之有自。皆力於善而無怠於繼承。世之君子觀此。亦足以矯然而知勸矣。

韻語

丹青之巧。摹寫物之形。聖言之妙。貫穿物之理。因丹青之形而求其本真。因聖言之妙而求其所以。是謂象內求心。非聖人安能至此。

書絳守居園池記後

近得樊紹述絳守居園池記石本。於今太守臨川王公汝續。記前後劉孫冲何亮序書。多論樊記之失。偶記舊收元人文集中有是記句解。檢得之。則灤陽趙仁舉辨疑附其後。復深辨孫何之說非是。余既未得親考絳之遺迹。與樊記合否。但以趙說觀之。恐今石本中尚有舛誤。賢太守更能參互考正。并句解刻之。則千載奇文。晦而復顯。亦可備絳郡遺事之一端。他亦不足深辨云。

書諸葛武侯出師表後

嘗謂義利二者不能並立。古之君子能建大功立大業。垂大名於萬世者。未嘗不重義而輕利也。如諸葛武侯自昭烈枉顧。卽以身許馳驅。其所以勞心焦思。謨畫規圖者。曷嘗頃刻而不以討賊興漢爲義哉。至其爲子孫衣食之計者。不過成都之桑八百株。薄田十五頃而已。外此則別無絲毫取於人而益其家也。其重義輕利如此。故能噓炎光於已燼之日。續漢統於既絕之秋。雖弗克遂其攘除姦兇。興復漢室。還於舊都之志。而大義固已伸於天下。宜其偉烈洪名。垂諸萬世而不泯也。切怪後之君子建功立業者。莫不慨然以古人自期。然其爲義之公。或有不勝其計利之私。故其正大光明之業。有不及古人遠矣。愚因讀武侯出師表有感而書此於其後云。

書貞節堂詩文後

監察御史濟南王允母氏太孺人劉。自其年二十有六。已喪其偶。時允方五歲。其弟信方三歲。孺人上無翁姑之倚。下無僮僕之資。惟自力於紡績。以給衣食。奉祭祀。撫遺孤。勤苦勞悴。貧約困阨。人所不堪。而孺人自勵其操愈堅。鄉里遠邇。咸以王節婦稱之。允年七歲。孺人使讀孝經。及頗通文義。卽遣入郡庠。使從良師友游。以廣其業。允竟登進士第。拜今官。信亦克成立。以幹其家。時孺人年已七十矣。猶康健不衰。值國家舉推恩之典。允父某。贈監察御史。劉封太孺人。有司復以孺人節行上於朝。詔所司旌表其門閭。由是孺人之節行。積於家庭。信於鄉里。顯於國家。實有命服之貴。旌異之榮焉。於乎。天下古今之理。豈有大於節義者哉。節義者。人道之大防也。妻之於夫。猶臣之於君。不幸而遭變故。婦當效節於其夫之死。而靡貳其行。臣當効節於其君之死。而靡貳其操。誠以婦道。臣道所全者。節義耳。又豈可爲飢寒禍患所迫。貪生畏死。自壞其節義哉。故程子有言。婦婦餓死事極小。失節事極大。自常情觀之。孰肯以死而易生。自節義觀之。則廉恥根於天理。民彝之固有。廉恥喪。則天理亡。而彝道泯。雖幸得苟且安利於一時。曾與禽獸無以異。以是知程子之言。非真知節義之重於死者。不能識也。婦道如此。則臣道可知矣。孺人當其盛年喪偶之時。固以死自誓。蓋不以凍餓殞亡易其心。卒能守節四十餘年。潔白堅貞之行。無纖毫之疵隙。夷考從古以來。人臣號爲讀書知禮義。至臨大節而易其守者。不如孺人多矣。況彼失節之婦。接迹皆是。曾何足以髣髴孺人之萬一哉。然則孺人所以因其子貴者。實由其以節顯。固宜垂榮名於竹帛。與天地而

同久矣。允嘗作堂以奉孺人。士大夫往往作爲詩文。以發揚其事。雄章雅製。聯爲巨帙。允閒持其帙求予言。遂書此於其後云。

書文丞相遺翰後

御史張君諫持宋文丞相遺翰來。俾予書其後。予觀之。蓋文山與宜春趙宰手帖也。張君重之惟甚。竊惟古之遺墨。所以見重於後世者。不以其人之賢乎。當宋室垂亡之秋。其守帥憑堅城。握強兵。望風送款。投戈屈膝者相望也。而文山以狀元宰相。奮孤忠以報國。誓將返瀛汜之日。於中天提疲卒當勁敵。雖流血顛沛。困苦艱危。脫身死亡之餘。而憤憤興復之志。猶庶幾於萬一。及束手起兵。雖苦戰不支。以歸。而長揖元之君相不拜。蓋此身可盡。可粉而志不可以威武屈。卒之從容就死。以成仁。其大節炳燿。軒轟宇宙。閒懷懷乎立萬世君臣之大義。回視棄滅天常之降臣叛將。曾犬豕之不如。則其忠賢冠絕千古。豈人之所能及哉。宜其遺墨僅一幅。而爲人所悚敬。珍藏垂二百年。而新猶一日也。嗚呼。重其遺墨者。本慕其人也。張君重此帖。固知所慕矣。使世之君子。得此帖而觀之。得不慨然知所重而慕之哉。

書劉忠愍公遺翰後

劉忠愍公與予爲辛丑進士。正統四年。予僉憲山東至京師。公時爲講官。畱飲。具論邊事。將有後來之患。又二年爲正統六年。召爲大理少卿。又二年爲正統八年。公上疏言十事。其一卽前四年所論邊事疏。有詆訐權臣語。遂爲所扼擠以死。又六年爲正統十四年。公所言邊事大驗。今聖天子乃別白邪正。誅滅權

奸。追贈公翰林學士。加今諡。遣官祭以少牢。所以褒卹禮儀。光榮隆厚。而公之名。一日震耀天下。嗚呼。自古以來。士鮮全節。如公者。天地閒蓋不多見。其明有以燭事幾於未然。其忠欲以救事勢於將然。其直氣正言。至於忤權奸死而不悔。是蓋天與之以全節。足以爲人臣之大防。立萬世之人紀矣。類若予輩之庸碌不足爲重輕者。何足道哉。何足道哉。又三年爲景泰三年冬。得公與張御史手書觀之。追想平生。三復慨歎。書此以志於其後云。

書嘉瓜集後

太祖高皇帝臨御之五年。句容民張觀。獻其園所產二實同蒂嘉瓜於朝。旣賚之錢。遣歸。禮官因進言。嘉瓜乃聖德和同國家協慶之瑞。詞臣亦獻頌以美焉。聖祖乃製讚以示不居其瑞之意。復諭臣下曰。縱朕有德。天必不示以一物之祥。且草木之祥生於其土。亦惟其土之人應之。於朕何預。若盡天地閒時和歲豐。乃王者之禎也。夫禮官詞臣以嘉瓜爲瑞者。如彼。聖祖則推而弗居。以時和歲豐爲禎者。如此。蓋自漢唐宋以來。雖英賢之君。鮮不爲祥瑞之所媚惑。惟我聖祖取時和歲豐爲禎。不以草木一物爲瑞。誠足以超越千古。垂法萬世矣。雖然。當斯之時。陰陽順序。年穀屢登。所謂王者之禎。旣昭見於太和之世。而此嘉瓜者。實亦和氣所鍾。聖祖雖不有其瑞。而國家聖子神孫。宗支蕃衍。繼繼承承。億萬斯年。豈非嘉瓜爲兆之一端歟。而觀之宗族七八十年以來。亦漸繁盛。今其孫諫。由進士爲御史。籍甚有聲。聖祖所諭草木之祥生於其土。亦惟其土之人應之者。又足徵也。是則國家厚德深仁。培植基本。導致休祥。固所以褒世於

無窮。而御史君益當上體聖祖之大訓。下念大父之肇祥。奉其親長。率其子孫。敦行仁義忠孝之道。於不怠。庶有以衍厥祥於悠久。不然。所資者多。而所積者有限。譬之泉焉。不數浚其源。而流將竭。祥其可恃乎哉。御史君既摘五倫書所載嘉瓜事實。益以家乘所傳。彙而爲集。名士大夫皆有作。閒亦求予言。遂書此於其後云。

題漢武帝迎申公圖

余觀漢武帝迎申公圖。喟曰。茲事不見於世久矣。當時武帝能以玉帛安車禮聘賢者如此。庶幾三代招賢之盛典。然申公既至。有爲治不在多言。顧力行何如之對。不合。雖以爲大中大夫。尋竟罷歸。惜乎武帝有招賢之名。無用賢之實也。武帝旣然。抑不知申公所謂力行者何事邪。竊意人君力行。莫大於誠意正心修身。以行王道於天下。使申公之言果出於此。而武帝允迪之。則漢之治何三代之不如哉。然以汲黯內多欲。而外施仁義之言觀之。彼旣以多欲內盡其心。固無望其能力行。所言以致治也。漢千載之後。有如程朱之眞儒。所以告其君者。皆誠意正心修身以行王道之言。當時皆莫之用。則不能力行以爲治者。又不特武帝爲然也。因是以知三代而下。所以治不復古者。其原皆出於此。三撫斯圖。書此以識其後。

題騎都尉孔勛誥後

右誥一道。今給事孔公恂。上世祖孔公勛。仕宋眞宗時。特恩所授也。勛爲宣聖之嗣。其家世之慶善顯榮。綿歷古今。儒者言之備矣。余皆置不贅論。獨念自宋以來。數百年間。數罹變故。雖天下之巨藏重寶。大有

勢力者或弗能保爲己有。惟此誥僅一幅。而其子孫乃能世謹收藏。宛然如舊。豈亦有數存於閒邪。抑孔氏之子孫所重者異於彼耶。然則觀者於此。可以矯然而知所警矣。

書河南參政陳公詩後

永樂初年。先君子復任滎陽縣教諭。時余年方十五。河南參政陳宗問。浙江寧波府鄞縣人。以進士任工部主事。陞前職。其爲人有學有守。尤好激勵後進。因行屬至滎陽。索余詩彙觀。遂贈余一律。且序之曰。觀其所作。才充而氣廣。不數年間。將見問學淹通。聲名洋溢。祿位不卑。非余儕備員苟祿者之可比矣。其詩有知爾晚來成大器。願修德業贊雍熙之句。時陳公年逾六十。鬢髮皓然。而乃獎進余之穉昧。復深自謙抑如此。可見前輩忠厚之至。俯仰今昔。垂六十年。顧余老而無聞。不能副所期望。祇增愧耳。然公之厚意則不可忘。遂書其事於詩後云。

魏純傳

魏純字希文。山東高密人也。其先世多仕者。至其父爲官江南。希文就學於江南。初治易。後明春秋。詩書大義。亦皆知之。其父爲績溪令。時希文客金陵。一時達官貴人。聞希文名。屏勢就見請交。因合幣羅致館中。俾訓其子弟。未幾。人有所指摘。語及希文。譏戍邊衛。寓蘄州玉田縣。先君子永樂七年。教訓其邑。希文復誨諸將官子於學宮傍。瑄因得納交爲心友。自是往返凡十年。議論連日夜不舍。瑄之疏劣。賴希文規輔之益爲多。先君子官滿去。希文徒步送數十里。執手爲別。別三年。書一得書。自是信音不相聞者又三

年。其後先君子丁大父母憂。起復至北京。時希文亦以薦至吏部。因同膺薦者有所不合。復退如初。又二年爲宣德元年。侍從有薦希文舉行者。復召至京師。集試吏部。文既合格。將上其名於朝。以官之。而希文竟暴卒於旅次。是年某月某日也。明年春。瑄在河南。始聞其訃。先是瑄有詩懷希文。考希文亡日。與瑄作詩時。皆在宣德元年冬。豈非交情之密。默有感觸於中。而不能自己於言乎。嗚呼。瑄嘗觀古人論富貴貧賤。必皆曰有命。瑄少猶未之信。年來經涉既久。數數考之於己。驗之於人。然後有以見。夫富貴貧賤。蓋皆有決然不易之命。而非人之私智所能去取也。以吾希文觀之。其賦質粹而明。其爲學正而純。其立心必欲一毫無愧於屋漏。其制行必欲一事不悖於天理。是則以德言之。希文之賢。固當見用於時也。處戎伍僅三十年。超然自適。不爲顯者焜耀。而有自沮之色。其貧至於牀無完衾。身無完褐。耕穫薪芻之事。靡不備嘗。而操行堅如金石。略不少變。其所處。蓋有古人所難者。而希文優處之。以時言之。希文困極宜通。當不至於終困也。至其忠信之行。積於中。徵於外。武夫小子。皆信其爲善人。而起尊敬之心。搢紳大夫。皆知其爲君子。而咸欲其得位於時。是則以人事言之。希文名實孚於遠邇。亦當顯於世也。三者皆無絲髮可疑。而乃卒至於窮死。不得一試其有。則所謂決然不易之命。豈不信哉。瑄又竊有疑焉。夫所謂命者。果何自而然哉。蓋出於天也。天必貴有德。福仁人。希文乃不克蒙其貴與福。則所謂天者。竟何如哉。豈貴德福善者其常。而貴福差爽者不得其常乎。果天道自然而然。初無心於其閒乎。抑人之生也。適本其氣之清濁厚薄不齊。而非天之所能爲乎。是皆不可知也。或者又謂天於善人。不有以福其躬。必有以昌其後。是

又未可必也。雖然古之所謂善人君子者。顧自處何如耳。固未嘗以命之厚薄爲輕重也。昔固有貴爲卿相。富彙千金。生無益而死無聞者。命則厚矣。其於道果何如哉。以希文之賢。雖卒至於窮死。其德行名譽。孚於人人。其自處者。旣已無愧於道矣。命之厚薄。奚足道哉。奚足道哉。瑄與希文交最久。情最密。始以希文之不遇。質之命而自疑。終以希文之無愧。揆之道以自解。又恐希文之潛德懿行。久而或泯於世也。遂作傳以志於私篋。以傳之悠久。且俾世之君子。當力於爲善而無疑於命云。

蕭都御史傳

蕭氏諱中。字存中。世居江西之龍泉。其里曰南園。世稱南園蕭氏。存中曾大父諱暉甫。大父諱福可。父諱民遠。凡三世俱以德善承繼。一迹遠引。弗耀於時。存中賦質剛敏。篤志問學。大能繼述。三父志以增彙其德善。在鄉里。直言正色。是是非非。無少假借。雖爲鄉人之善者。敬服歸向。卒不悅於羣小。以是醜正健訟之徒。妄相與鑿空造言。意欲搆陷。存中獨先識其幾微。謂其家曰。辟言於行不食古亦有之。吾不可不行其戒。遂挈家避居外邑者。將十五年。後知鄉里訟風稍息。乃還舊居。所謂南園者。其鄉里善人老者喜其歸。少者仰其德。俗遂變爲仁里。爭訟殆絕。存中乃益治其舊田園。課僮僕勤力其中。不數年。生意益饒。於前時。大有所積。則斥其餘以周困窶。不責所負。丁亥歲。臨袁傍郡執役之人。伐木歸自湖湘者。旣飲食不時。疲於道路。加以隆暑鬱蒸。病者死者。扶路相望。居人皆以爲疫癘染人。閉戶無敢出視。存中獨曰。是有命。疫癘安能染人。乃大出湯藥。分遣所親多方救濟。役夫賴以全活者甚衆。存中旣讀書知義。尤篤於宗

族無閒疏戚遠近有女孤無依者爲具妝奩擇所歸使無過時男長不能娶者資給以聘禮使無失配其於家法閨庭內外秩如雍如嚴而有恩訓其子孫一以道義不及於利其子啓者既得存中家傳之學登宣德丁未進士第歷官監察御史山東按察僉事陞僉都御史奉敕兩鎮河開府居庸關其所職皆風紀戎政大事存中數戒以書俾處心以公仁持己以廉慎行事以古人偉節盡功自期待勿爲區區小利汨迷身心撓損名節啓能恪守其戒所至守不可奪事無不立人無不悅卓然爲時之名臣存中貽教厥子者可謂正且大矣啓鎮守居庸時存中棄世邊務方殷朝廷勉畱啓歷誠懇乞終制至於再三詔乃許奔喪奪情起復及至又領敕巡撫山右久之謝病歸將奉存中之祀於家啓之既忠且孝則存中教及厥子者又可謂善且美矣啓爲監察御史推恩封存中如其官啓既陞都憲又推恩誥贈存中中憲大夫都察院右僉都御史云

蕭敍仁字說

禮曰已冠而字之成人之道也釋者曰古者童子雖貴名之而已冠而後實字之以成人之道敬其子也都憲蕭公子榮冠禮請學士劉公爲賓因字之曰敍仁劉公復序其字取孟子仁則榮不仁則辱故因其名而字之曰敍仁蓋欲其勉於爲仁而行之有序也夫道之至大者莫大於仁孔門弟子自顏子以下皆未嘗以仁許之誠以仁爲萬善之長偏言則一事專言則包義禮智三者故孔子教人惟以求仁爲言蓋盡仁則四者之性無不盡矣至其爲仁之要則其告顏子以非禮勿視聽言動者是也是則仁道雖大有

非後學所敢易言。然人得天地之理以爲性。初不以聖愚而有異。聖人之所以爲教。學者之所以爲學。莫不本於是焉。故雖初學之士。凡志於道者。必當從事於斯也。今學士公既以敍仁字榮矣。敍仁其可不深思仁道之至大而未易言者。以用力於求之之要哉。且施仁之序。雖自親以及疏。自近以至遠。而其本則在乎求諸心而已。使心有不仁。則以何者施於遠近親疏之間哉。求諸心者無他。卽非禮勿視聽言動是也。敍仁必當念茲在茲。無終食造次顛沛之違。勉之又勉。用力之久。庶幾克去人欲。復全天理。而本心無一毫之不仁。則施仁之敍。無往而不達。有安榮之效。無危辱之事。禮所謂冠而字之成人之道者。將於是乎在。不惟無負於學士公字之意。亦無忝於都憲公矣。若徒尙乎敍仁之名。而無爲仁之實。殆見身心之間。尙且迷繆乖紊之無敍。尙何以施諸親疏遠近。而得夫安榮之效哉。敍仁其勉之。敍仁其戒之。

試諸生策一道

問。天地之間。理氣而已。河圖五十有五之數。一六水居北。二七火居南。三八木居東。四九金居西。五十土居中。奇偶之數。固八卦之所由畫也。然此皆以氣言而不及於理。何歟。洛書因一二三四五六七八九之數。第而爲五行五事八政五紀。皇極三德。稽疑庶徵。五福之疇。固兼以理氣言矣。先儒謂河圖洛書相爲經緯。八卦九疇相爲表裏。然一以氣言。一兼以理言。果何以有經緯表裏歟。厥後周子作太極圖。其曰無極而太極者。純以理言也。自陰陽五行男女化生萬物。則兼以氣言而理爲之主也。然周子非有河圖洛書之可據。而太極圖之作。果有合於義畫禹疇之旨歟。諸子於易書周子之學。必嘗講之。試爲我陳其說。

